


陝西通志




第六十卷

人物六

直諫

D8
793
S45S5
1735.
V.60



陝西通志第六十卷

人物六

直諫

周

芮伯桑柔芮伯刺厲王也

詩序

芮伯畿內諸侯王卿士也字良夫

毛詩箋

厲王悅榮夷公芮良夫曰夫榮公好專利而不知大難夫王人者將導利而布之上下者也今王學專利其可乎匹夫專利猶謂之盜王而行之其歸鮮矣榮公爲卿士諸侯不享

國語

虢文公宣王即位不藉千畝虢文公諫曰不可夫民之大事在農王

事惟農是務三時務農一時講武乃能媚於神而和於民今天子

欲修先王之緒而棄其大功置神之祀而困民之財將何以求福

用民王勿聽

國語

文公虢叔之後西虢也宣王都鎬在畿內也

史記周本

紀注

左儒友於杜伯皆臣周宣王宣王殺杜伯而非其罪左儒爭之於王
九復之而王勿許王曰別君而異友斯汝也左儒對曰臣聞之君
道友逆則順君以誅友友道君逆則率友以違君王怒曰易而言
則生不易而言則死左儒對曰臣聞古之士不枉義以從死不易
言以求生臣能明君之過以死杜伯之無罪王殺杜伯左儒死之

說苑

家父作誦以究王訕式訛爾心以畜萬邦

詩經小雅

節南山家父刺厲王

也

詩序

正義曰作詩刺王而自稱字者期於

申寫下情冀上改悟而已家父盡忠竭誠不憚誅罰故自載字焉

毛詩疏

霍黃

下邳人

魏文侯與士大夫坐問曰寡人何如君也羣臣皆曰仁君

也次至翟黃曰君非仁君也曰子何以言之對曰伐中山不以封君之弟而以封君之長子臣以此知之文侯大怒逐翟黃黃起而出次至任座文侯問寡人何如君也任座對曰仁君也曰子何以言之對曰臣聞之其君仁者其臣直向翟黃之言直臣是以知君仁君也文侯復召翟黃入拜爲上卿新序

甘龍

秦大夫

秦孝公欲用衛鞅之言恐大臣不從於是召衛鞅甘龍杜

摯三大夫慮世事之變計正法之本使民之道公孫鞅曰君亟定變法之慮行之無疑甘龍曰不然臣聞聖人不易民而教智者不變法而治因民而教者不勞而功成據法而治者吏習而民安之今君變法不循故更禮以教民臣恐天下之議君願君熟慮之公孫鞅曰智者作法愚者制焉賢者更禮不肖者拘焉拘禮之人不足與言事制法之人不足與論治君無疑矣杜摯曰利不百不變

法功不什不易器法古無過循禮無邪君其圖之公孫鞅曰治世
不一道便國不必古反古者未可非循禮者未足多君無疑矣於
是孝公違龍摯之善謀從衛鞅之過言

新序

馮唐其父徙安陵唐以孝著為中郎署長事文帝文帝曰吾居代時
吾尚食監高祛數言趙將李齊之賢父知之乎對曰尚不如廉頗
李牧之為將也上悅曰吾獨不得廉頗李牧為吾將唐曰陛下雖
得廉頗李牧弗能用也上怒讓曰公何以知吾不能用也對曰臣
竊聞魏尚為雲中守匈奴入尚擊之所殺甚衆上功莫府一言不
相應文吏以法繩之臣愚以為陛下法太明賞太輕罰太重雖得
廉頗李牧弗能用也帝說是日令馮唐持節赦魏尚復以為雲中
守拜唐為車騎都尉景帝立為楚相免武帝立求賢良舉馮唐唐

時年九十餘不能官以唐子遂爲郎遂字王孫亦奇士

史記本傳

袁盎者楚人也字絲父徙安陵爲郎中絳侯之國人上書告反諸公莫敢言惟盎明絳侯無罪得釋淮南厲王驕甚盎諫曰諸侯太驕必生患可削地上弗用王益橫謀反事覺遷之蜀至雍病死上哭甚哀盎入頓首請罪上曰以不用公言至此盎由此名重朝廷官者趙同以幸常害盎盎患之盎兄子種爲常侍騎說盎曰君廷辱之使其毀不用文帝出趙同參乘盎伏車前曰臣聞天子所與共六尺輿者皆天下豪英陛下獨奈何與刀鋸餘人載於是上笑下趙同帝從霸陵上欲西馳下峻阪盎擎轡曰陛下縱自輕奈高廟太后何上乃止上幸上林皇后慎夫人從及坐郎署長布席盎引卻慎夫人坐盎以數直諫不得久居中調爲隴西都尉仁愛士卒皆爭爲死遷齊相徙爲吳相吳王厚遇盎盎告歸吳楚反聞鼂錯

欲請治盜未決盜恐夜見寶嬰願至上前口對狀乃召入具言吳楚反狀獨斬錯以謝吳吳可罷錯誅吳楚已破上以元王子禮為楚王盜為楚相病免居家景帝時時使人問籌策梁王欲求為嗣盜進說其後語塞梁王怨盜使刺客殺盜安陵郭門外史記本傳錯已死謁者僕射鄧公為校尉擊吳楚還上書言軍事曰吳為反數十年矣發怒削地以誅錯為名其意非在錯也夫錯患諸侯強大請削地以尊京師萬世之利也計畫始行卒受大戮內杜忠臣之口外為諸侯報仇臣竊為陛下不取也帝默然良久曰公言善吾亦恨之乃拜鄧公為城陽中尉鄧公城固人也多奇計建元中上招賢鄧公起家為九卿謝病免歸子章以修黃老言顯諸公間鼂錯傳車千秋本姓田氏其先齊諸田徙長陵千秋為高寢郎會衛太子為江充所譖敗以之上急變訟太子寃是時上頗知太子惶恐無他

意乃大感悟召見千秋曰父子之間人所難言公獨明其不然此高廟神靈使公教我立拜爲大鴻臚數月遂爲丞相封富民侯千秋敦厚有智居位自稱踰於前後數公昭帝初千秋年老上優之朝見得乘小車入宮殿中號曰車丞相子順官雲中太守

漢書本傳

徐福茂陵人霍氏奢侈上疏言霍氏泰盛陛下即愛之宜以時抑制無使至亡書三上輒報聞其後霍氏果滅而告霍氏者皆封人爲福上書曰茂陵徐福數上書言霍氏且有變宜防絕之向使說得行則國無裂土出爵之費臣無逆亂誅滅之敗今往事既已而福獨不蒙其功唯陛下察之書奏上賜福帛十疋復以爲郎

漢書霍光傳

史丹字君仲魯國人徙杜陵祖父恭有女弟武帝時爲衛太子良娣產悼皇考宣帝即位恭已死三子高曾元皆以外屬舊恩封侯宣帝即位拜高爲車騎將軍領尚書事帝崩太子襲尊號是爲元帝

高薨諡曰安侯元帝爲太子時丹爲中庶子侍從十餘年元帝即位爲駙馬都尉侍中上以丹舊臣詔丹護太子家是時傳昭儀子定陶共王有才藝王皇后無寵元帝嘗墮銅丸以摘鼓定陶王亦能之上數稱其材丹曰所謂材者敏而好學皇太子是也帝嘿然中山哀王薨太子前吊不哀上大恨丹曰臣見陛下哀痛中山王至以感損向者太子進見臣竊戒無涕泣感傷陛下罪乃在臣上意解竟寧元年上寢疾數問尚書以景帝時立膠東王故事丹以親密臣得侍疾候上間獨寢時直入臥內頓首涕泣言曰皇太子以適長立積十餘年名號繫於百姓天下莫不歸心今路道流言以爲太子有動搖之議審若此公卿以下必不奉詔臣願先賜死以示群臣上意大感曰吾無有此議都尉安所受此語丹頓首曰愚臣妄聞罪當死上謂丹善輔導太子無違我意丹嘘唏而起太

子由此遂爲嗣矣成帝即位遷右將軍後徙左將軍光祿大夫封武陽侯丹爲人足知愷悌愛人貌若儻蕩不備然心甚謹飭故尤得信於上爲將軍前後十六年以病歸第數月薨諡曰頃侯

漢書本傳

張猛字子游城固人以光祿大夫給事中侍元帝當廟祭濟渭欲御樓船御史大夫薛廣德當車免冠乞剉血汙車輪帝不悅猛進曰主聖則臣直今乘船危就橋安聖主不乘危故大夫言之帝曰曉人不當如是邪後爲幸臣弘恭石顯所譖毀猛自殺

漢中士女志

平當字子思祖父自下邑徙平陵當以明經爲博士公卿薦當議論通明給事中每有災異當輒傳經術言得失元帝時韋元成爲丞相奏罷太上皇寢廟園當上書言太上皇漢之始祖後嗣所宜尊奉上納其言復太上皇寢廟園頃之使行流民幽州舉奏刺史二千石勞佚有意者言渤海塩池且勿禁以救民急所過見稱累遷大

鴻臚先是太后姊子淳于長白言昌陵不可成當以爲作治連年可遂就上既罷昌陵以長首建忠策議封長當又以爲長雖有善言不應封爵之科左遷鉅鹿太守當以經明禹貢使行河爲騎都尉領河隄哀帝即位徵當爲光祿大夫至丞相賜爵關內侯明年卒子晏以明經歷位大司徒封防鄉侯

漢書本傳

杜欽字子夏

延年子杜陵人

少好經書目偏盲茂陵杜鄴與欽同姓字俱以

才能稱京師故衣冠謂欽爲盲杜子夏以相別欽惡以疾見詆乃爲小冠由是京師更謂欽爲小冠杜子夏大將軍王鳳請欽爲大將軍武庫令欽爲人深博有謀自上爲太子時以好色聞及即位皇太后詔采良家女欽說大將軍鳳曰禮一娶九女所以極陽數廣嗣重祖也將軍輔政宜建九女之制詳擇有行義之家求淑女之賢無必有聲色音技能爲萬世大法鳳白之太后太后以爲故

事無有欽復重言鳳不能自立法度但循故事而已後有日蝕地震之變詔舉直言欽上對曰陛下正后妾抑女寵防奢泰去佚游躬節儉親萬事如此即堯舜不足比隆咎異何足消滅欽以病罷後徵詣大將軍莫府數稱達名士王駿韋安世王延世等救解馮野王王尊胡常之罪過及繼功臣絕世鎮撫四夷當世善政多出於欽者以壽終

漢書杜周傳

朱雲字游魯人徙平陵年四十從博士白子友受易又事前將軍蕭望之受論語皆能傳其業好倜儻大節是時少府五鹿充宗貴幸爲梁邱易元帝好之欲考其異同令充宗與諸易家論會有薦雲者召入抗首而請音動左右既論難連拄五鹿君繇是爲博士遷杜陵令坐故縱亡命會赦舉方正爲槐里令數上疏言丞相韋元成容身保位元成言雲暴虐無狀雲遂廢成帝時丞相故安昌侯

張禹以帝師位特進甚尊重雲上書曰臣願賜尚方斬馬劔斷佞臣一人以厲其餘上問誰也對曰安昌侯張禹上大怒御史將雲下雲攀殿檻折呼曰臣得下從龍逢比干遊足矣左將軍辛慶忌叩頭殿下曰此臣狂直使其言是不可誅其言非固當容之上意解得已後當治檻上曰勿易因而輯之以旌直臣後不復仕常

居鄠年七十餘終於家

漢書本傳

班伯

况子長安人

少受詩於師丹大將軍王鳳薦伯宜勸學拜爲中常侍

遷奉車都尉定襄太守歲餘徵伯伯道病中風既至以侍中光祿

大夫養病賞賜甚厚起視事自富平定陵侯張放淳于長等愛幸

設宴飲之會皆引滿舉白談笑大噱時乘輿幄坐張畫屏風畫紉

醉踞妲已作長夜之樂上顧指畫而問伯伯曰沈湎於酒微子所

以告去也式號式譁大雅所以流連也詩書淫亂之戒其原皆在

於酒上廼喟然歎曰吾久不見班生今日復聞讜言放等因罷出
遷水衡都尉侍中每朝東宮常從及有大政俱使諭指於公卿病
卒弟穉少爲黃門郎中常侍方直自守成帝季年立定陶王爲太
子數遣中盾請問近臣穉獨不敢答哀帝即位遷廣平相平帝即
位太后臨朝莽秉政方欲文致太平使使者分行風俗采頌聲而
穉無所上大司空甄豐劾穉絕嘉應嫉害聖政不道穉上書願歸
相印入補延陵園郎太后許焉

漢書
叙傳

王嘉字公仲平陵人以明經射策甲科爲郎鴻嘉中舉敦朴能直言
召見宣室對政事得失超遷大中大夫出爲九江河南太守治甚
有聲遷御史大夫建平三年爲丞相封新甫侯嘉爲人剛直嚴毅
有威重上甚敬之哀帝初立嘉上疏薦儒者公孫光滿昌及能吏
蕭咸薛修等天子納而用之時侍中董賢愛幸欲因東平事以封

賢嘉上封事上感其言止後日食嘉復奏封事上寢不悅而愈愛賢會傳太后薨上因託傳太后遺詔益封賢嘉封還詔書因諫上上怒召詣廷尉嘉喟然曰幸得充備宰相不能進賢退不肖以是負國死有餘責繫獄二十餘日不食死元始四年追錄忠臣封嘉子崇爲新甫侯諡嘉爲忠侯

漢書本傳

鄭崇字子游本高密大族祖父徙居平陵父賓明法律爲御史名公直崇少爲郡文學史哀帝擢爲尚書僕射數諫爭上初納用之每見弋革履上笑曰我識鄭尚書履聲久之上欲封祖母傳太后從弟商崇諫曰今無故封商壞亂制度逆天人心非傳氏之福崇又以董賢貴寵過度諫由是重得罪尚書令趙昌佞譖素害崇奏崇與宗族通疑有姦上責崇曰君門如市人何以欲禁切主上崇對曰臣門如市臣心如水願得考覆上大怒下崇獄窮治死獄中

漢書

本傳

郭欽

隃麋人

哀帝時爲丞相司直奏免豫州牧鮑宣京兆尹薛修等又

奏董賢左遷盧奴令平帝時遷南郡太守王莽時以病免官

漢書鮑宣

傳

張湛字子孝平陵人矜嚴好禮動止有則三輔以爲儀表成哀間爲二千石建武初爲左馮翊在郡修典禮設條教政化大行後五年拜光祿勳光武臨朝有惰容湛輒陳諫其失嘗乘白馬帝每見湛輒言白馬生且復諫矣代王丹爲太子大傅及郭后廢因稱疾不

朝後數年卒

後漢書本傳

申屠剛字巨卿茂陵人七世祖嘉文帝時丞相剛質性方直慕史鮪汲黯之爲人王莽篡位避地河西轉入巴蜀及隗囂據隴右欲背漢剛說之歸國囂不納建武七年詔書徵剛拜侍御史遷尚書令

光武嘗欲出游剛以隴蜀未平不宜宴安逸豫諫不聽遂以頭輟乘輿輪帝遂止時帝法理嚴察羣臣莫敢正言剛輒極諫失旨出爲平陰令復徵拜大中大夫以病去官卒於家

後漢書本傳

朱勃

扶風人

馬援卒帝追收新息侯印綬賓客故人莫敢弔會援同郡

朱勃詣闕上書願下公卿平援功罪宜絕宜續以厭海內之望書奏報歸田里勃字叔陽年十二能誦詩書常候援兄况方領矩步辭言嫺雅援裁知書見之自失况酌酒慰援曰朱勃小器速成智盡此耳卒當從汝稟學勿畏也勃未二十右扶風請試守渭城宰及援爲將軍封侯勃位不過縣令援雖貴常待以舊恩及援遇讒惟勃能終焉

後漢書馬援傳

樂恢字伯奇長陵人父親爲縣吏得罪於令收將殺之恢年十一伏寺門晝夜號泣令聞而矜之即解出親長好經學事博士焦永閑

廬精誦不交人物遂爲名儒性廉直介立行不合已者雖貴不與交後仕本郡爲功曹選舉不阿徵拜議郎會竇憲出征匈奴恢數上書諫爭朝廷稱其忠入爲尚書僕射刺舉無所迴避憲兄弟放縱恢上書諫不省乃稱疾乞歸竇憲風厲州縣迫脅遂飲藥死竇氏誅門生何融等上書陳恢忠節除子已爲郎中

後漢書本傳

已字伯

文爲郎非其好也去官

三輔決錄注

何敞字文高平陵人元和中辟太尉宋由府司徒袁安深重之時京師及四方累有奇異鳥獸草木言事者以爲瑞敞通經傳言於二公曰瑞應依德而至災異緣政而生今異鳥翔於殿屋怪草生於庭際不可不察居無何而肅宗崩以高第拜侍御史數切諫言諸竇罪過憲等深怨之出爲濟南太傅敞至國輔以道義數引法度諫正之遷汝南太守以寬和爲政分遣儒術大吏案行屬縣百姓

化其恩禮修理鮦陽舊渠墾田增三萬餘頃遷五官中郎將

後漢書本傳

李法字伯度南鄭人博通羣書性剛而有節永元九年應賢良方正對策除博士遷侍中光祿大夫歲餘上疏以爲朝政苛碎宦官權重椒房寵盛又譏史官記事不實坐失旨免還鄉里在家八年徵拜議郎諫議大夫正言極辭無改於舊出爲汝南太守政有聲迹

後歸卒於家

後漢書本傳

朱寵字仲威京兆人篤行好學從桓榮授尚書

後漢書桓榮傳注

鄧騭死大

司農朱寵痛騭無罪遇禍乃肉袒興觀上疏追訟曰伏惟和熹皇后聖善之德爲漢文母兄弟忠孝同心憂國歷世外戚無與爲比而橫爲宮人單辭所陷罪無申證獄不訊鞫遂令騭等罹此酷濫率土喪氣宜收還冢次寵樹遺孤奉承血祀以謝亡靈寵知其言

切自致廷尉詔免官歸田里順帝即位擢寵爲太尉錄尚書事寵初辟隲府稍遷潁川太守治理有聲拜太尉封安鄉侯甚加優禮

鄧隲傳

蘇章字孺文平陵人祖父純字桓公有高名三輔號爲大人官南陽太守章少博學能屬文安帝時舉賢良方正對策高第爲議郎數陳得失出爲武原令歲饑輒開倉廩活三千餘戶順帝時遷冀州刺史故人爲清河太守章行部案其姦臧乃請太守爲設酒肴陳平生之好甚歡曰今夕蘇孺文與故人飲者私恩也明日冀州刺史案事者公法也遂舉正其罪州境望風畏肅換爲并州刺史以摧折權豪坐免

後漢書本傳

魏齊卿扶風人危言深論不隱豪強自公卿以下莫不畏其貶議屢

履到門

漢書黨錮傳叙

陳雅字伯臺城固人靈帝時為諫大夫閹宦用事上疏不省出為巴

郡太守年七十五卒臨終戒子薄葬

漢中士女志

楊奇

震曾孫華陰人

靈帝時為侍中帝嘗從容問曰朕何如桓帝對曰陛下

之於桓帝亦猶虞舜比德唐堯帝不悅曰卿強項真楊震子孫死
後必復致大鳥矣出為汝南太守帝崩復入為侍中衛尉從獻帝
西遷有功勤及李傕脅帝歸其營奇潛誘傕部曲楊昂等令反傕
由此孤弱帝乃得東後徙都許追封奇子亮為陽成亭侯

後漢書楊

震傳

趙戩字叔茂長陵人質而好學辟公府入為尚書選部郎董卓欲以

所私並充臺閣戩拒不聽卓怒欲殺之觀者皆為戩懼而戩自若
及見卓引辭正色陳說是非卓屈而謝之遷平陵令故將王允被
害莫敢近者戩棄官收斂之三輔亂戩客荊州曹公平荊州辟為

掾後爲相國鍾繇長史年六十餘卒

典

楊偉字世英馮翊人明帝治宮室偉諫曰今作宮室斬伐生民墓上

松柏毀壞碑獸辜及亡人傷孝子心不可以爲後世法則

世語曹爽

秉政鄧颺等欲爽立威名勸使伐蜀爽乃西至長安發卒從駱谷

入關中轉輸不能供兵不得進參軍楊偉爲爽陳形勢宜急還颺

與偉爭於爽前偉曰颺將敗國事可斬也爽乃引還

魏志曹爽傳

傅嘏字蘭石泥陽人伯父吳黃初中爲侍中尚書嘏弱冠知名正始

初除尚書郎遷黃門侍郎時曹爽秉政何晏與嘏不平因微事免

詔官司馬宣王請爲從事中郎曹爽誅爲河南尹遷尚書時論者

議欲自伐吳詔以訪嘏嘏對曰賊君臣僞立吉凶同患設令列船

津要堅城據險橫行之計其殆難捷未若明法練士措計於全勝

之地也後吳諸葛恪新破關東乘勝欲向青徐朝廷將爲之備
以爲淮海非賊輕行之路不過遣偏率小將乘海沂淮示動青徐
恪自並兵來向淮南耳後恪果圖新城不克而歸叡常論才性同
異鍾會集而論之嘉平末賜爵關內侯進封武鄉亭侯母邱儉文
欽作亂或以司馬景王不宜自行唯叡勸之景王遂行以叡守尚
書僕射俱東儉欽敗叡有謀焉以功進封陽鄉侯薨諡曰元侯

魏志

本傳

杜錫字世嘏

預子杜陵人

少有盛名起家長沙王文學累遷太子中舍人

性亮直忠烈屢諫愍懷太子言辭懇切太子患之置針着錫常所
坐氊中刺之流血他日太子問錫錫對醉不知後轉衛將軍長史
趙王倫篡位以爲治書御史孫秀求交於錫錫非之秀憚其名高

不敢害惠帝反政遷尚書左丞卒

晉書杜預傳

傳元字休奕泥陽人祖燮漢漢陽太守父韓魏扶風太守元少孤貧博學善屬文性剛亮勁直不能容人之短舉秀才除郎中遷弘農太守所居稱職數上書陳便宜多所匡正武帝爲晉王以元爲散騎常侍及受禪加駙馬都尉元上疏曰近者魏武好法術天下貴刑名魏文慕通達天下賤守節今陛下聖德龍興受禪臣又奚言惟未舉清遠有禮之臣以敦風節未退虛鄙以懲不恪臣是以猶敢有言詔使元草詔進之元復上疏帝下詔曰常侍懇懇於所論可謂乃心欲佐時益者也泰始四年以爲御史中丞復上便宜五事遷大僕卿時比年不登羌胡擾邊詔公卿會議元陳事切直轉司隸校尉元天性峻急不能容物每有劾奏或值日暮捧白簡整簪帶踈踊不寐坐而待旦於是貴遊斂跡臺閣生風卒諡曰剛子

咸字長虞剛簡有大節風格峻整疾惡如讎推賢樂善咸寧初襲父爵拜太子洗馬出爲冀州刺史遷司徒左長史在位多所執正轉車騎司馬咸以世俗泰侈上疏曰奢侈之費甚於天灾欲時之儉當詰其奢又議移縣獄於郡及二社應立朝廷從之遷御史中丞會詔舉郡縣補內官咸上書曰興化之要在於官人競內薄外遂成風俗此弊誠宜急革使內外通塞無偏耳咸再爲本郡中正遭繼母憂去官頃之起以議郎長兼司隸校尉時朝廷寬弛豪右恣放咸奏免河南尹澹左將軍倩等京都肅然咸以長吏到官未幾便遷百姓困於無定吏卒疲於迎送時僕射王戎兼吏部咸奏戎不能寧謐風俗請免官吳郡顧榮曰傳長虞勁直忠果劾按驚人雖非周才偏亮可貴也元康四年卒官子數晞纂數字穎根清靜有道素解屬文元帝引爲從事中郎晞亦有才思爲上虞令

有政績卒於司徒西曹屬

晉書本傳

魏

楊昱字元晷

椿子華陰人

起家廣平王懷左常侍王好武事出遊獵昱每

規諫後除散騎侍郎延昌三年以本官帶詹事丞時肅宗在懷抱中出入左右乳母而已不令宮寮知昱諫曰臣等備位宮城太子動止宜令翼從陛下若召太子必降手敕令臣下咸知爲後世法詔曰自今已後非朕手敕勿令兒出宮臣在直者從至萬歲門久之轉太尉掾兼中書舍人靈太后從容謂昱曰今帝年幼朕親萬幾卿有所聞慎勿隱諱昱於是奏揚州刺史李崇載貨恒州刺史楊鈞造銀食器具並餉領軍元乂太后召乂泣責之孝昌初遷給事黃門侍郎賊圍豳州詔昱兼侍中持節催大都督北海王顥仍隨軍監察豳州圍解雍州賊張映姜神達知州內空虛謀欲攻掩

刺史元脩請援都督李叔仁遲疑不赴昱曰長安關中基本若長安不守大軍雖往何益遂與叔仁等俱進斬神達餘悉奔散孝莊入洛昱爲東道行臺後歸鄉里爲朱天光所害子孝邕員外郎走匿蠻中結渠帥謀誅朱氏徵服入洛世隆收殺之

魏書楊播傳

王韶字子相世居京兆幼方雅好奇節在周累以軍功至儀同三司高祖受禪進爵項城郡公晉王廣鎮并州除行臺右僕射性剛直王甚憚之王穿池起三山韶自鎖而諫王謝而罷之平陳之役支度軍機無所擁滯及尅金陵韶即鎮焉秦王俊爲并州總管仍爲長史歲餘馳驛入京勞敝而卒高祖甚傷惜之命取子相封事數十紙傳示羣臣上曰其直言匡正裨益甚多吾每披尋未嘗釋手子士隆慷慨有父風官至備身將軍數討擊山賊往往有捷王世

充借號士隆憂憤疽發背卒

隋書本傳

韋焜京兆人爲民曹屢進讜言

隋書高構傳

蕭瑀字時文後梁明帝子也以女兄爲隋晉王妃故入長安愛經術善屬文性鯁急鄙遠浮華拜內史侍郎數言事忤旨見忌出爲河池郡守高祖入京師挈郡自歸拜民部尚書秦王領右元帥攻洛陽署瑀府司馬武德元年遷內史令帝委以樞筦內外百務悉關決瑀自力孜孜抑過繩違無所憚上每見納用手詔曰得公言社稷所賴朕既寶之故賜黃金一函公其勿辭是歲州置七職秦王爲雍州牧瑀爲州都督詔嘗下中書未即行帝讓其稽瑀曰隋季內史詔敕多違舛百司不知所承今朝廷初基所以安危者係號令比承一詔必覆審使先後不謬始得下此所以稽留也帝曰若

爾朕何憂乎王世充平進尚書右僕射貞觀初房元齡杜如晦新得君瑀不能無少望太宗怒廢於家俄復爲僕射帝問瑀朕欲長保社稷奈何瑀曰三代有天下所以能長久者類封建諸侯以爲屏藩秦置守令二世而絕漢分王子弟享國四百年魏晉廢之亡不旋跬此封建之有明效也帝納之始議封建遷御史大夫參預朝政瑀諭議明辯然不能容人短意或偏駁不通而向法深罷爲太子少傅復爲太常卿拜河南道巡省大使九年復參預政事帝嘗曰武德季太上皇有廢立議顧朕挾不賞之功於昆弟弗見容瑀於爾時不可以利怵死懼社稷臣也因賜詩曰疾風知勁艸板蕩識誠臣又曰守道耿介古無以過然善惡太明或有時而失瑀頓首謝曰旣蒙教又許以忠亮雖死日猶生年也晉王爲皇太子拜太子太保同中書門下三品瑀中狹每燕見輒言房元齡等朋

黨帝爲瑀曉解瑀以帝有所偏信帝積久亦不平詔奪爵下除商州刺史卒遺命斂以單衣無卜日詔陪葬昭陵謚曰肅子銳太常

少卿

唐書本傳

蘇世長武功人祖彤仕後魏通直散騎常侍父振周宕州刺史父死王事有詔襲爵入隋爲長安令數條上便宜大業末爲都水少監督漕上江煬帝被弒發喪慟聞行路洛陽平始歸拜諫議大夫從獵涇陽大獲帝詫左右曰今日畋樂乎世長曰陛下廢萬幾事游獵不滿十旬未爲樂也帝色變既而笑曰狂態發耶曰爲臣計則狂爲陛下計忠矣又侍宴披香殿酒酣進曰此煬帝作耶帝曰卿好諫似直然詐也豈不知此殿我所營耶對曰臣見傾宮鹿臺非受命聖人所爲天下厭隋侈以歸有道今乃即其宮加雕飾焉欲易其亂得乎帝咨重其言貞觀初出爲巴州刺史舟敗溺死子良

嗣高宗時爲周王府司馬王年少不法良嗣數諫王以法繩府官不職者甚見尊憚遷荊州長史帝遣宦者采竹江南所過縱暴至荊州良嗣囚之上書言狀帝下詔慰獎徙雍州良嗣政尚嚴每盜發三日內必禽號稱神明垂拱初拜納言封溫國公留守西京尚方監裴匪躬案諸苑建言鬻果蔬儲利良嗣曰公儀休一諸侯相拔葵去織未聞天子賣果蔬與人爭利遂止遷文昌左相同鳳閣鸞臺三品遇薛懷義於朝懷義偃蹇良嗣怒叱左右批其頰曳去武后聞之戒曰第出入北門彼南衙宰相行來毋犯之卒年八十三子踐官太常丞爲酷吏所陷子務元終長史

唐書本傳

韋挺萬年人父冲仕隋爲民部尚書挺少與隱太子善高祖平京師署隴西公府祭酒貞觀初王珪數薦之拜御史大夫是時承隋大亂風俗薄惡挺上疏曰父母之恩昊天罔極今衣冠上族辰日不

哭謂爲重喪親賓來吊輒不臨舉又閭里細人每有重喪不即發問先造邑社待營辦具乃始發哀既葬隣伍會集酣醉名曰出孝夫婦之道王化所基故有三日不息燭不舉樂之感今婚嫁之初襍奏絲竹以窮宴懽官司習俗弗爲條禁望一切懲革申明禮憲俄爲黃門侍郎改太常卿以怨望貶象州刺史卒子待價安息道行軍大總管萬石遷累太常少卿號任職後知吏部選事

唐書本傳

權萬紀萬年人父琢玠隋匡州刺史以愿慤聞萬紀倖直廉約自潮州刺史擢治書侍御史僕射房元齡侍中王珪掌內外官考萬紀劾其不平太宗以爲不阿貴近由是獎禮萬紀又建言宇文智及受隋恩賊殺其君萬世共棄今其子乃任千牛請斥屏以懲不軌帝從之徙散騎常侍久之徙吳王長史王畏其直善遇之齊王祐不奉法帝素奇萬紀能左右吳王乃徙爲祐長史祐比暱群小萬紀

驟諫不入即條過失以聞祐恐與所嬖燕弘亮謀殺之贈武都郡

公諡曰敢子元初高宗時兵部侍郎

唐書本傳

于志寧字仲謚高陵人高祖入關率群從迎謁遷天策府中郎文學

館學士貞觀三年爲太子左庶子太子承乾數有過惡志寧欲救

止之上諫苑以諷俄兼詹事以母喪免帝遣中書侍郎岑文本敦

譬就職時太子以農時造曲室又好音樂過度志寧諫不納又私

引突厥與相狎比志寧上疏極言太子大怒遣張師政紇干承基

往刺之二人入其第見志寧惓然在苦塊中不忍殺乃去太子敗

帝知狀謂曰聞公數諫承乾不聽公故至此時宮臣皆罪廢獨志

寧蒙勞勉晉王爲皇太子復拜左庶子遷太傅拜太子太師卒諡

曰定

唐書本傳

蕭鈞

瑀從子長安人

有才譽永徽中累遷諫議大夫弘文館學士盧文操

璅盜庫財高宗以其職主幹當自盜罪死鈞曰囚罪誠死然恐天下聞謂陛下重貨輕法任喜怒殺人帝曰真諫議也詔原死太常工爲宮人通訊遺詔殺之且附律鈞言禁當有漸雖附律工不應死帝曰如姬竊符朕以爲戒今不濫工死然喜得忠言即宥工徙遠夷終太子率更令子瓘爲渝州長史居母喪以毀卒鈞兄子嗣

業擢累鴻臚卿單于都護府長史

唐書蕭瑀傳

楊弘武

弘禮弟華陰人

永徽中累爲吏部郎中擢司戎少常伯遷西臺侍郎

帝嘗讓曰爾在戎司授官多非其才何也對曰臣妻剛悍此其所屬不敢違諷帝用后言也帝笑不罪乾封二年同東西臺三品弘武謙慎自守居職以清簡稱卒謚曰恭三子元亨元禧元禕並至

刺史

唐書楊弘禮傳

姚班

壽弟萬年人

篤學有立志擢明經歷六州刺史政皆有績遷太子詹

事時節愍太子稍失道班凡四上書諫太子雖稱善不能用其言及敗索宮中得班諫書中宗嘉嘆擢右散騎常侍遷秘書監睿宗

立拜戶部尚書卒年七十

唐書姚思廉傳

韓瑗字伯玉三原人父仲良刑部尚書潁川縣公瑗少負節行貞觀中以兵部侍郎襲爵永徽三年遷黃門侍郎進侍中兼太子賓客王后之廢瑗雪泣言曰皇后乃陛下在藩時先帝所娶今無罪輒廢非社稷計不納明日復諫帝大怒詔引出褚遂良貶潭州瑗上言遂良受先帝顧託願寬無辜以順衆心帝不聽瑗憂憤自表歸田里不報顯慶二年貶振州刺史卒自瑗與遂良死內外以言爲

諱將二十年

唐書本傳

袁利貞

朗從祖弟長安人

高祖時爲周王侍讀王立爲太子帝欲大會群臣

命婦合宴宣政殿設九部伎散樂利貞上疏諫以爲前殿路門非

命婦宴會倡優進御之所請徙命婦別殿九部伎從左右門入罷散樂不進帝納之既會詔利貞曰卿奕葉忠鯁能抗疏規朕之失賜物百段擢祠部員外郎卒

唐書素
朝傳

王琳字方慶周石泉公褒曾孫家咸陽父弘直爲漢王元昌友元昌畋獵無度上書切諫元昌漸見疎斥轉荆王友龍朔中卒方慶年十六起家越王府參軍永淳中累遷太僕少卿則天臨朝拜廣州都督管内諸州首領舊多貪縱百姓詣府稱冤府官先受首領參餉未嘗鞫問方慶絕其交往首領縱暴者悉繩之境内清肅證聖元年召拜洛州長史萬歲登封元年遷鸞臺侍郎同平章事俄轉鳳閣侍郎則天幸玉泉寺以山徑危懸欲御腰輿而上方慶諫曰昔漢元帝嘗出便門御樓船光祿勳張猛奏曰乘船危就橋安元帝從橋今山徑危險石路曲狹比於樓船安危不等伏望停輿駐

蹕則天納其言而止又舉令耆功喪未葬不預朝賀未終喪不預宴會比來朝官不遵禮法名教既虧實玷皇化伏望申明令式禁斷從之方慶以老疾乞閒乃授麟臺監修國史封石泉公卒諡曰貞方慶博學好著述尤精三禮酬答咸有典據

舊唐書傳本

王石泉居

相時子為眉州司士天后嘗問曰卿子何遠乎對曰廬陵是陛下愛子今猶在遠臣之子焉敢相近

會昌品集

方慶孫補明經辟范陽

節度使張守珪幕府時契丹屈烈部將謀入寇河北騷然備至虜中脅說禍福虜乃不入安祿山叛拜博陵常山太守副河北招討

使卒

唐書本傳

李昭德長安人父乾祐貞觀初為殿中侍御史鄒令裴仁軌私役門卒太宗欲斬之乾祐曰法令與天下共之仁軌以輕罪置極刑非畫一之制由是免死母卒廬墓側資土成墳帝遣使就弔表其閭

歷治書侍御史有能名免官卒昭德強幹有父風擢明經累官鳳閣侍郎同平章事武承嗣任文昌左相昭德諫曰承嗣已王不宜典機衡以惑衆庶乃罷洛陽人王慶之請以承嗣爲皇太子后遣昭德詰其故昭德答殺慶之奏曰自古有姪爲天子而爲姑立廟乎陛下承天皇顧託而有天下又立承嗣臣見天皇不來食矣后乃止有人獲洛水白石而赤文者獻闕下曰此石赤心故以獻昭德叱曰洛水餘石豈盡能反邪時來俊臣侯思止舞文法數誅陷大臣人皆懾懼昭德每奏其誣罔不道狀卒榜殺思止其黨稍摧沮萬歲通天二年來俊臣誣以逆謀既而俊臣亦下獄同日誅衆庶莫不寃昭德而快俊臣建中三年贈司空

唐書本傳

田歸道

仁會子長安人

明經及第累擢內供奉左衛郎將突厥默啜請和武

后詔將軍閻知微冊可汗號默啜又遣使謝知微遇諸道即與緋

袍銀帶因表使者即到請備禮廷賜歸道諫曰知微擅賜使朝廷何以加之宜敕初服須天子命后從焉默啜將至單于都護府詔歸道攝司賓卿往勞之默啜請六胡州及都護府地不得執歸道將害之歸道辭色不撓為陳禍福默啜悔以禮遣歸歸道還具陳默啜不臣狀請備邊已而果反乃擢歸道夏官侍郎遷左金吾將軍押千騎宿衛元武門桓彥範誅二張歸道不豫聞及索騎士拒不應事平彥範欲誅之以辭直免中宗壯其守召拜太僕少卿遷右金吾將軍卒諡曰烈子賓庭開元時至光祿卿

唐書田仁會傳

韋月將

京兆人

武三思得幸於中宗月將不堪憤激上書告其事中宗

怒流於嶺南尋使人殺之

大唐新語

蘇珣藍田人中明經第調鄆尉鄆多訟珣裁決明辨垂拱初為監察御史武后殺韓魯諸王付珣密牒按訊珣推之無狀或言珣助韓

魯者后詰之挺議無所撓詔監軍河西五遷右司郎中御史王弘義附來俊臣爲酷世莫敢觸其鋒珣按奏弘義坐免進左肅政臺御史大夫中宗將斬韋月將珣執據時令不可大戮忤三思意出爲岐州刺史復爲右臺大夫會節愍太子敗時睿宗居藩爲獄辭牽逮珣密啓保辯帝感悟多所舍貸擢戶部尚書致仕卒諡曰文

唐書
本傳

常湊字彥宗萬年人祖叔諧貞觀中爲庫部郎中與弟吏部郎中叔謙兄主爵郎中季武號三列湊永淳初解褐婺州參軍事遷揚州法曹州人孟神爽豪縱數犯法交通貴戚吏莫敢繩湊按治杖殺之遠近稱服六遷司農少卿睿宗立徙太府兼通事舍人時改葬故太子重俊有詔加諡又詔雪李多祚等罪議贈官湊上言宜易諡以合經禮多祚等罪云免而不雪帝瞿然罷多祚等贈官景

雲初作金仙等觀奏諫以爲農月興功傷伐甚多非仁聖本意出
爲陝汝岐三州刺史開元初欲建碑靖陵湊以古園陵不立碑又
方旱不可興工諫而止遷將作大匠詔復孝敬皇帝廟號義宗湊
諫孝敬皇帝未嘗南面無稱宗之義遂罷遷右衛大將軍徙太原
尹卒諡曰文子見素字會微及進士第擢諫議大夫天寶五載爲
江西山南黔中嶺南道黜陟使繩糾吏治所至震畏遷文部侍郎
銓叙平允十三載詔拜武部尚書同平章事集賢院學士知門下
省事祿山表請蕃將三十二人代漢將帝許之見素謂楊國忠曰
難將作矣國忠不應見素曰知禍之芽不能防見禍之形不能制
焉用彼相明日當懇論之既入流涕具陳詔曰朕徐圖之由是每
進見未嘗不爲帝言未幾祿山反從帝入蜀詔兼左相封豳國公
肅宗立與房琯崔渙持節奉傳國璽及冊宣揚制命明年三月拜

尚書左僕射徙太子太師詔至蜀郡奉迎太上皇以功食實封三百戶寶應元年卒贈司徒諡忠貞子諤歷京兆府司錄參軍國忠死兵聚不解陳元禮請殺貴妃以安衆心帝猶豫諤陳曰臣聞以計勝色者昌以色勝計者亡今宗廟震驚陛下惟割恩以安社稷因叩頭流血帝悟賜妃死軍乃大悅尋擢御史中丞後終給事中

唐書
本傳

韓休長安人父大智洛州司功參軍其兄大敏仕武后爲鳳閣舍人梁州都督李行褒爲部人告變詔大敏鞠治或曰行褒諸李近屬后意欲去之無列其寃大敏至驗出之后怒遣御史覆按卒殺行褒而大敏賜死休工文辭舉賢良中乙科擢左補闕進至禮部侍郎知制誥出爲虢州刺史遷尚書右丞拜黃門侍郎同平章事休直方不務進趨既爲相天下翕然時政得失言之未嘗不盡帝嘗

稍過差必視左右曰韓休知否已而疏至嘗引鑑不樂左右曰自韓休入朝陛下無一日歡何不去之帝曰吾雖瘠天下肥矣卒諡

文忠贈太子太師

唐書本傳

李尚隱其先出趙郡徙貫萬年舉明經調下邳主簿神龍中擢左臺監察御史崔湜鄭暗典部選附勢倖銓擬不平尚隱劾其罪湜等皆斥去睦州刺史馮昭泰性驚刻人憚其彊嘗誣繫桐廬令李師旦二百餘家爲妖蠱有詔御史覆驗皆稱病不肯往尚隱請行果雪其寃進御史中丞御史王旭招權稍不制仇家告其罪尚隱窮治具得奸贓無假借遂抵罪遷河南尹尚隱性剛亮論議皆披心示誠處事分明御下不苛尤詳練故實前後制令誦記無遺以太

子賓客卒諡曰貞

唐書本傳

唐紹

臨孫長安人

神龍時爲太常博士遷左臺侍御史度支員外郎韋庶

人請妃公主命婦以上葬給鼓吹詔可詔言鼓吹本軍容黃帝戰涿鹿以爲警衛惟功臣詔葬得兼用之請置前詔用舊典不省中宗始郊國子祭酒祝欽明等奏以皇后亞獻安樂公主終獻紹固爭帝又詔武氏陵及諸武墓皆置守戶紹請罷之又言比羣臣務厚葬下逮衆庶流蕩成俗願按令切敕裁損凡明器不許列衢路惟陳墓所昏家盛設障車擁道爲戲樂傷化紊禮不可示天下事雖不從議者美嘆睿宗即位數言政事損益再遷給事中兼太常

少卿

唐書唐
臨傳

辛替否字協時萬年人景龍中爲左拾遺時置公主府官屬而安樂府補授尤濫武崇訓死主棄故宅別築第侈費過度又盛興佛寺公私疲匱替否上疏帝不省睿宗立罷斜封官千餘人俄詔復之方營金仙玉真觀替否以左補闕上疏帝不能用稍遷右臺殿中

侍御史雍令劉少微恃權貪贓替否按之岑義屢以爲請替否曰
我爲憲司懼勢縱罪謂王法何少微坐死遷累潁王府長史卒

唐書

本傳

嚴挺之名浚以字行華陰人少好學姿質軒秀舉進士并擢制科調
義興尉號材吏姚崇爲州刺史異之崇執政引爲右拾遺先天二
年正月望夜然百千燈帝御延喜安福門縱觀閱月未止挺之上
疏陳五不可誠意忠到帝納焉開元中累進給事中典貢舉時號
平允宰相張九齡雅知之用爲尚書左丞知吏部選李林甫與九
齡同輔政戶部侍郎蕭炆林甫所引嘗與挺之言稱伏臘爲伏獵
挺之白九齡省中有伏獵侍郎乎乃出炆岐州刺史林甫恨之除
洛州刺史徙絳州天寶初帝顧林甫曰嚴挺之材可用林甫因給
挺之使稱疾已言挺之春秋高有疾幸閑官得自養乃以爲員外

詹事詔歸東都挺之重交游許與生死不易當時重之子武字季鷹幼豪爽母裴不爲挺之所答獨厚其妾英武始八歲怪問其母母語之故武憤然以鐵鎚就英寢碎其首左右驚白挺之曰卽戲殺英武辭曰安有大臣厚妾而薄妻者兒故殺之非戲也父奇之曰真嚴挺之子以蔭調太原府參軍事累遷侍御史從元宗入蜀至德初赴肅宗行在擢劍南節度使破吐蕃七萬衆於當狗城遂收鹽川加檢校吏部尚書卒

唐書嚴武傳

楊瑒字瑤光華陰人五世祖縉陳交愛九州都督子林甫隋柳城太守高祖軍興遣子琮招之挈郡以來授絳州刺史琮歷沔綏二州刺史人咨其廉瑒始爲麟遊令時竇懷貞大營金仙玉真二觀檄取畿內嘗負逆人貲者暴斂之以佐費瑒拒不應懷貞怒曰縣令而拒大夫命乎瑒曰所論者民冤抑也位高下乎何取懷貞壯其

對爲止擢累侍御史京兆尹崔日知貪沓不法瑒謀劾之反爲日知先搆瑒廷奏曰肅繩之司一爲恐脅所屈開姦人謀則御史府可廢元宗直之逐日知進瑒戶部侍郎帝召宰相大臣議天下戶版瑒言利病尤詳帝咨賞宇文融建檢脫戶餘口瑒執不便出爲華州刺史帝封太山集樂工山下居喪者亦在行瑒謂起苴經使和鍾律非人情所堪帝許乃免入爲國子祭酒遷大理卿以疾辭改左散騎常侍卒諡曰貞瑒在官清白吏請立石紀德瑒曰書名史氏足矣若碑頌者徒遺後人作硎石耳瑒伯父志操頗剛簡未遇時著閒居賦自託位終司屬卿安平縣男瑒從父兄晏精孝經學常手寫數十篇可教者輒遺之

唐書本傳

闔用之

立德曾孫
萬年人

初爲彭州參軍嘗攝錄事一日糾愆謬不法數十

事太守以爲材後舉通事舍人累遷右衛郎將知引駕仗金吾將

軍李質升殿不解刀呵却之請按以法左右震悚始有司以三衛
執扇登殿用之奏三衛皆驕悍不宜升陞邇御坐請以宦者代遂
為故事終左金吾將軍

唐書閣
立本傳

姚南仲下邳人乾元初擢制科遷累右補闕大曆十年獨孤皇后崩
代宗悼痛詔近城為陵朝夕臨望南仲上疏曰臣聞葬者藏也欲
人之不得見也王者據高明燭幽隱今起陵目前心一感傷累日
不平陛下諡后以貞懿而終以褻近臣竊惑焉帝嘉納拜義成節

度使入朝授尚書右僕射卒諡曰貞

唐書
本傳

韋肇

貫之父
杜陵人

大曆中為中書舍人累上書言得失為元載所惡左遷

京兆少尹久之改秘書少監載曰肇若過我當擇善地處之終不

肯詣載誅除吏部侍郎卒諡曰貞

唐書韋
貫之傳

常袞京兆人天寶末及進士第性狷潔不妄交遊由太子正字累為

中書舍人文采瞻蔚譽重一時魚朝恩判國子監袞奏成均之任
當用名儒不宜以宦者領職又天子誕日諸道爭以侈麗奉獻不
則爲老子浮屠解禱事袞以爲諸道餽獻類出於民是斂怨以媚
上也請皆還之諸祠寺寫經造像焚幣埋玉以巨萬計若以易芻
粟減貧民之賦福豈有量哉代宗嘉納遷禮部侍郎元載死拜門
下侍郎同平章事德宗即位貶湖州刺史建中初起爲福建觀察
使始閩人未知學袞至設鄉校親加講導由是俗一變歲貢士與
內州等卒於官後閩人春秋祀袞於學宮云

唐書本傳

蕭復字履初

衡子長安人

歷歙池二州刺史治狀應條遷湖南觀察使父

乃拜兵部侍郎德宗狩奉天欲西如鳳翔依張鑑復曰鳳翔乃泚
舊兵今泚悖亂當有同惡者雖鑑臣畏不免帝曰朕業行留一日
以驗爾言俄而鑑爲李楚琳所害以是拜吏部尚書同平章事復

嘗言艱難以來始用宦者監軍權望太重是曹正可委宮掖事兵要政機叵使參領帝不聽又言陛下厥初清明自楊炎盧杞放命穢盛德播越及茲今貼於危當懲艾前敗帝謂左右曰復慢我因詔復充山南江淮湖南嶺南等道宣撫安慰使興元初進門下侍郎中官馬欽緒揖宰相劉從一附耳語既而從一密諭復曰有詔與公議向所奏不欲李勉盧翰聞知復曰堯舜有僉曰之言朝廷大事尚當謀及公卿如勉等非其人當罷去既曰宰相而謀議可獨避之乎今與公行此或可第恐寢以生常政由是敝從一以聞帝不悅復辭疾上政事許之卒年五十七復望闕高華勵名節不通狎流俗及爲相臨事嚴方數拂帝意子湛湛子寘咸通中位宰相無顯功寘子邁咸通中擢進士第乾符中累擢戶部侍郎僖宗入蜀拜同平章事累拜司空邁負大節以王佐自任既當國丰采

峭整天下噐之時田令孜權寵可炙公卿無不附順唯邁未嘗少
下諸節度共劾令孜生事離間大臣邁與裴澈計共召朱玫於邠
玫起兵奉迎令孜迫帝幸陳倉玫怒令孜并望帝不諒其心謂邁
曰諸王才可任天下者不乏邁曰人非伊霍欲爲禍首未利也玫
立嗣襄王煬罷邁爲太子太保邁移疾不出帝還宮即賜死邁行
完而材逢世多故召懷臣以濟亂不得其死人爲哀之

唐書本傳

李元素字太朴

長安人

爲御史東都留守杜亞惡大將令狐運會盜劫

輸絹於洛北運畋近郊亞疑而訊之請斥運醜土詔元素馳按元
素徐察其寃悉縱所囚以還亞劾元素失有罪比元素還帝已怒
奏獄未畢帝曰出元素曰臣言未盡帝曰第去元素曰臣以御史
按獄知寃不得盡辭是無容復見陛下帝意解即道運寃狀帝感
悟曰非卿孰能辨之後歲餘齊抗得真盜由是天下重之滑鄭節

度使盧羣卒拜元素檢校工部尚書節度其軍治有異績元和初

進戶部尚書判度支元素少孤奉長姊謹姊沒悲鯁成疾卒唐書本傳

馬彞扶風人

曹王臯除山南東道節度使初彞未知名臯始辟之卒以

正直稱漢陽王張柬之有林園在州西公府多假之游宴臯將買

之彞言曰漢陽有中興功遺業當百代保之王縱欲之奈何令其

子孫自鬻焉臯謝曰主吏失詞為足下羞微足下安得聞此言舊唐書李

書李

臯傳

許孟容長安人父鳴謙究通易象官撫州刺史孟容舉進士授秘書

省校書郎

冊府元龜

孟容辟武寧張建封府李納以兵拒境建封使孟

容見納敷引逆順納悔謝罷兵德宗知其能召拜禮部員外郎公

主子求補崇文生孟容不可主訴之帝問狀以著令對帝嘉其守

累遷給事中京兆上言好時風電害稼帝遣宦人覆視不實奪尹

以下俸孟容曰府縣上事不實罪應罰然宜更擇御史一人參驗乃可不聽浙東觀察使判官齊總暴斂以獻帝擢總衢州刺史孟容還制曰總無功超授羣議謂何詔中傳自袁高爭盧杞後凡十八年門下無議可否者至孟容數論駁四方想見其風貞元十九年夏大早上疏帝不悅改太常少卿元和初遷京兆尹神策軍自興元後日驕恣府縣不能制軍吏李昱貸富人錢八百萬三歲不肯歸孟容遣吏捕詰與之期曰不如期且死一軍盡驚訴於朝憲宗詔以昱付軍治之再遣使皆不聽奏曰不奉詔臣當誅然錢未盡輸昱不可得帝嘉其守正許之京師豪右大震累遷吏部侍郎盜殺武元衡孟容白宰相願白天子起裴中丞輔政使主兵柄索賊黨罪人得矣後數日果相度俄拜東都留守卒謚曰憲孟容方勁有禮學每所折衷咸得其正第季同始署西川韋臯府判官劉

闢反棄妻子歸拜監察御史終宣歙觀察使

唐書本傳

白居易字樂天太原人徙下邳父季庚彭城令李正己之叛說刺史李侑自歸累擢襄州別駕居易敏悟絕人工文章元和元年對制策一等調盪厓尉遷左拾遺四年天子下詔蠲貸居易建言乞盡免江淮兩賦且多出宮人憲宗頗采納河東王鐸將加平章事居易以鐸誅求百計不恤彫瘵今若假以名器則紀綱大壞是時孫璿以禁衛勞擢節度使張奉國平李錡有功遷金吾居易言宜罷璿進奉國以疎天下忠臣心會王承宗叛帝詔吐突承璀出討居易諫唐家制度未有以中人專統領者四方聞之必輕朝廷既而兵老不決居易上言承璀進不決戰觀其勢似陰相爲計不急罷之且有四害後對殿中論執強鯁帝未諭輒進曰陛下誤矣帝變色罷拜左贊善時盜殺武元衡居易首請亟捕賊宰相嫌其出位

貶江州司馬久之入爲司門員外郎知制誥穆宗好游畋獻續虞人箴以諷於時天子荒縱居易雖進忠不見聽乃外遷爲杭州刺史築堤浚井復拜蘇州刺史病免開成初拜太子少傅會昌初以刑部尚書致仕卒居易於文章精切最工詩頗以規諷得失諡曰文從祖弟敏中長慶初第進士宣宗立以兵部侍郎同平章事會党項寇邊以司空兼鄜寧節度徙劍南西川治蜀有勞召還卒弟行簡擢進士累遷主客員外郎敏而有辭後學所慕向

唐書本傳

柳公權字誠懸

公綽弟華原人

元和初擢進士第穆宗拜侍書學士問用筆

法對曰心正則筆正帝改容悟其以筆諫也改弘文館學士文宗復召侍書遷中書舍人充翰林書詔學士嘗與六學士對便殿帝稱漢文帝恭儉因舉袂曰此三澣矣學士皆賀獨公權對曰人主當進賢退不肖納諫諍明賞罰服澣濯之衣此小節異日與周墀

同對論事不阿帝徐曰卿有諍臣風可屈居諫議大夫乃自舍人下遷仍爲學士知制誥開成三年轉工部侍郎召問得失因言郭收領邠寧人謂獻二女乃有是除是日帝命中官自南內送女還家其忠益多類此咸通初以太子太保致仕卒公權博貫經術於詩書左氏春秋國語莊周尤邃其書法結體勁媚自目一家當時大臣家碑誌非其筆人以子孫爲不孝貶遺鉅萬主藏奴或盜用公權不復詰惟研筆圖籍自鐫秘之

唐書柳公綽傳

郭承嘏字復卿

睢孫華州人

元和中及進士第累遷起居舍人居母喪以

孝聞太和六年爲諫議大夫言政事得失文宗以鄭注爲太僕卿承嘏極論其非注頗懼進給事中時詔宰相分領度支戶部承嘏言宰相調和陰陽安黎庶若使閱視簿書校緡帛非宜帝納之遷

刑部侍郎卒

唐書郭子儀傳

魏謩字申之擢進士第爲右拾遺邕管經畧使董昌齡誣殺參軍衡方厚貶淑州司戶俄徙峽州刺史謩諫曰王者赦有罪唯故無赦此昌齡專殺不辜事跡暴章獄窮罪得特被矜貸中外以爲屈法今又授刺史復使治人紊憲章乖至治不見其可有詔改洪州別駕御史中丞李孝本宗室子坐李訓事誅死其二女沒入宮謩上言陛下即位不悅聲色今取孝本女內之後宮傷治道之本速塵穢之嫌惟陛下崇千載之盛德去一旦之玩好帝即出孝本女以謩爲右補闕教坊有工善爲新聲者詔授揚州司馬謩獨固諫不可工降潤州司馬荆南監軍呂令琬縱僉卒辱江陵令觀察使韋長避不發移內樞密使言狀謩劾長任察廉知監軍侵屈官司不以上聞私白近臣亂法度請明其罰不報俄爲起居舍人帝索起居注謩奏古置左右史書得失以存鑒戒陛下所爲善無畏不書

不善天下之人亦有以記之帝乃止中尉仇士良捕妖民賀蘭進興及黨與治軍中反狀具帝自臨問詔命斬囚以徇謩上言事繫軍即推軍中如齊民宜付府縣今獄不在有司法有輕重何從而知帝停決擢諫議大夫兼起居舍人弘文館直學士宣宗嗣位遷御史中丞發駙馬都尉杜中立姦賊權戚縮氣進同平章事建言今天下粗治惟東宮未立不早以正人傳導之非所以存副貳之重且泣下帝為感動累遷門下侍郎兼戶部尚書因久疾檢校尚書右僕射太子少保卒年六十六謬為宰相議事天子前他相或委蛇規諷惟謩讜切無所回畏宣宗嘗曰謩名臣孫有祖風朕心憚之然卒以剛正為令孤絢所忌讒罷之

唐書魏徵傳○按徵籍隸曲城謩其五世孫也

於陝無涉但舊志載徵有賜田在澄城謩因家焉後遂為澄城人故入之以備考

韋溫字弘育

綏子杜陵人

方十一歲舉兩經及第為著作郎遷右補闕宰相

宋申錫被搆罪不測溫率同舍伏閣切爭由是益知名太和五年
太廟室漏罅詔宗正將作營治不時畢文宗怒責卿李銳監王堪
奪其稟敕中人葺之溫請還將作會羣臣請上尊號溫固諫今河
南水江淮旱歉京師雪積五尺老稚凍仆非崇飾虛名時帝乃謝
羣臣久之爲給事中兼莊恪太子侍讀晨詣宮日中見太子諫曰
殿下宜雞鳴蚤作問安天子如文王故事太子不悅辭侍讀太子
得罪詔諭羣臣溫曰陛下訓之不早非獨太子罪時頗直其言遷
尚書右丞出爲陝虢觀察使民當輸租而麥未熟吏督之溫曰使
民貸田中穗以供賦可乎爲緩期而賦辦武宗立擢吏部侍郎出
爲宣歙觀察使威行部中卒諡曰孝

唐書韋
貫之傳

楊奐字公隱

嗣復孫
華陰人

累擢左拾遺昭宗初立數遊宴上疏極諫歷戶

部員外郎朱全忠入京師奐挈族客西南終諫議大夫

唐書楊
嗣復傳

王搏字昭逸咸陽人擢進士第辟佐王鐸滑州節度府累遷蘇州刺

史久之以戶部侍郎判戶部乾寧初進同中書門下平章事判度

支昭宗建嫡后搏請因赦天下以尊大其禮拜右僕射遷司空封

魯國公初中官權盛帝欲翦抑之自石門還政一決宰相群宦不

平搆藩鎮內脅天子搏曰人君務平心大體御萬物偏聽產亂古

所戒也今奄人盜威福偏制君上道路人皆知之方朝廷多難未

可卒除當徐以計去之事急且有變崔引與搏並位素忌搏明達

有謀即劾搏為中官外應會引罷宰相疑搏擠斥乃厚結朱全忠

薦已復輔政即譖搏將危社稷全忠因顯疏其尤光化三年罷為

工部侍郎貶溪州刺史又貶崖州司戶叅軍事賜死藍田驛唐書王方

慶傳

韓偓字致光萬年人擢進士第拜左拾遺後為翰林學士中書舍人

嘗與崔引定策誅劉季述昭宗反正爲功臣帝疾宦人欲盡去之
僖曰陛下誅季述時餘皆赦不問今又誅之誰不懼死天子威柄
今散在方面若上下同心攝領權綱猶與天下可治宦人忠厚可
任者使自翦其黨茂有不濟今公私牽屬不減二萬雖誅六七巨
魁未見有益適固其逆心耳帝曰此一事終始屬卿初李繼昭等
以功皆進平章事時謂三使相後更附韓全誨皆忌引引聞召李
茂貞入朝留子繼筠宿衛僖以爲不可引不納僖又語令狐渙渙
曰無衛軍則爲閹豎所圖矣僖曰不然無兵則家與國安有兵則
家與國不可保李彥弼見帝倨甚僖請逐之帝不用繼昭等欲毀
中自若僖曰三使相有功不如厚與金帛毋使預政事今宰相不
得端決事繼昭輩所奏必聽他日遽改則人人生怨初以衛兵檢
中人今敕使衛兵爲一臣竊寒心願召茂貞還其衛軍及引召朱

遂衛卒若茂貞不如詔即許全忠入朝未及

全忠倅勸引帝西幸倅夜追及見帝慟哭至鳳翔遷兵部侍

用而韓令

章貽範母喪詔還位倅當草制上言貽範處喪未

郎進

事傷孝子心學士馬從皓逼倅求草制倅曰腕可斷

明日百官至而麻不出宦侍合譟李茂貞入見帝曰命

學士不草麻非反耶艷然出帝畏茂貞卒詔貽範還相初

宴與京兆鄭元規威遠使陳班並席坐朱全忠崔引臨陞宣

坐者去席倅不動曰侍宴無輒立二公將以我為知禮全忠怒

倅薄已貶濮州司馬天祐二年挈其族南依王審知而卒兄儀字

羽光亦以翰林學士為御史中丞倅貶之明年帝宴文思毬場全

忠入百官坐廡下全忠怒貶儀棣州司馬

唐書本傳

宋

楊昭儉字仲寶長安人祖授刑部尚書父景諫議大夫昭儉登進士
第天福初爲翰林學士驕將張彥澤鎮涇原暴殺從事張式昭儉
抗疏論列請置之法疏奏不報昭儉復上疏願誅彥澤以謝軍吏
由是權臣忌之停官尋復中書舍人時河決數郡大發丁夫塞之
晉少主喜詔立碑記其事昭儉表諫曰陛下刻石紀功不若降哀
痛之詔摛翰頌美不若頒罪已之文言甚切至少主嗟賞卒罷其
事周世宗愛其才召入爲御史中丞多振舉臺憲故事開寶六年
以工部尚書致仕太宗即位就加禮部尚書卒

宋史
本傳

李濤字信臣萬年人後唐天成初舉進士甲科拜監察御史晉天福
初遷刑部郎中涇帥張彥澤殺記室張式奪其妻式家人詣闕上
訴晉祖以彥澤有軍功釋其罪濤伏閣抗疏請寘於法晉祖召見
諭之濤植笏叩階聲色俱厲晉祖怒叱之濤執笏如初諫不已晉

祖不得已罷彥澤節制漢祖起義以為翰林學士周初歷刑部戶部二尚書宋初拜兵部尚書建隆二年濤被病有軍校尹勲董浚五丈河陳留丁壯夜潰勲擅斬隊長陳琲等十人濤力疾草奏請斬勲家人謂濤曰公久病宜自愛朝廷事且置之濤憤言曰人孰無死但我為兵部尚書坐視軍校無辜殺人烏得不奏太祖嘉之削奪勲官爵配隸許州濤卒年六十四濤慷慨有大志以經綸為已任工為詩筆札適媚居家以孝友聞子承休至尚書水部郎中

宋史本傳

雷德驤長安人

宋史本傳作邵陽人

太祖時久居諫諍之任有直名與趙普有

隙時普以勲舊作相寵遇方渥驤言普專權容堂吏納賂由是忤旨貶商州司戶歲餘其子有鄰撾登聞鼓訴寃鞠得其實堂吏李可度除名餘黨皆杖脊黥配遠州出普知河陽召德驤復舊官擢

有隣守校書郎後普復入相德驤乞致仕太宗勉之曰朕保卿必
不爲普所擠有隣性亦剛鯁有父風太宗嘗面諭有隣朕欲用汝
父爲相何如有隣曰臣父非宰相器乃止王禹偁贈詩二首其二
曰當時詞氣壓朱雲老作皇家諫諍臣章疏罷封無事日朝廷猶
指直言人題詩野館光泉石講易秋堂動鬼神棘寺下僚叨末路
齋心惟祝秉鴻鈞蓋禹偁出德驤門下而德驤深易酷嗜吟咏故
也青箱雜記○按賈志有雷德遜云德驤之弟所載事蹟則王元
之贈德驤詩也考宋史德驤本傳不云有弟蓋即德驤一人賈
志誤分作兩人耳
閱青箱雜記可見

楊偕字次公中部人舉進士釋褐坊州軍事推官遷侍御史爲三司
度支判官時郭皇后廢偕與孔道輔范仲淹力爭富民陳氏女選
入宮將以爲后偕復上疏諫又數論陞降之弊擢知河中府夏竦
爲陝西經畧使請增置土兵易戍兵歸衛京師偕言關中財用乏

復增土兵徒耗國用今賊勢方盛雖大增土兵亦未能減戍兵東
歸竦奏偕沮邊計偕爭愈力進樞密直學士知并州有中官豫軍
事素橫偕至一繩以法軍政肅然明年改本路經畧安撫招討使
偕列六事於朝一罷中人預軍事二徙麟州三以便宜從事四出
冗師五募武士六專捕援朝廷不從偕累奏不已乃罷知邢州久
之致仕卒偕性剛而忠朴數上書論天下事子忱慤有雋才蚤卒

宋史
本傳

張昇字杲卿韓城人舉進士爲楚邱主簿王曾稱其有公輔器累官
至知雜御史昇性質樸不善擇言至斥張貴妃爲一婦人謂楊懷
敏得志不減劉季述仁宗讀之不懌以語陳升之升之曰此忠直
之言不激切則聖意不可回矣帝乃解至和二年拜御史中丞劉
沆在相位以御史范師道趙抃嘗攻其惡陰欲出之昇曰天子耳

目之官奈何用宰相怒而斥上章力爭之沆竟罷去帝見昇指切時事無所避謂曰卿孤立乃能如是對曰臣仰託聖主致位侍從是爲不孤今陛下之臣持祿養望者多赤心謀國者少竊以爲如陛下乃孤立爾帝爲之感動嘉祐三年遷樞密使昇愛惜官資凡內降所與多持不下見帝春秋高屢進言儲嗣事卒與韓琦同決策英帝立請老致仕熙寧二年薨諡曰康節

宋史本傳

楊敞字樂道進士及第授秘書省校書郎慶曆三年湖南唐和等劫掠州縣擢提點本路刑獄專治盜賊事乃募才勇深入遂平六峒以功遷太常博士賊復肆乃授敞荆湖南路兵馬鈐轄賊聞敞至皆遁明年賊復出敞出嶺外涉夏秋凡十五戰賊潰去入爲吏部員外郎上言願擇宗室之賢者使侍禁中爲宗廟計嘉祐三年地震明年日食復上疏言陛下宜立皇嗣以答天意改知制誥李珣

劉永年各遷秩畋當草制封還詞頭因言珣等無功特以外戚故除之恐非祖宗法不報嘉祐六年京師大水畋上言洪範五行傳簡宗廟則水不潤下又曰聽之不聰厥罰常水臣愚以爲萬幾之聽必有失於審者七廟之享必有失於順者乃下其章禮官并兩制考議咸言南郊二聖並侑溫成皇后立廟皆違經禮於是詔悉改之卒贈右諫議大夫畋出於將家喜學問與士卒同甘苦性清介謹畏每奏事必發封數四而後上自奉甚約及卒家無餘資

宋史

本傳○按畋傳不載邑里延綏鎮志作麟州新秦人神木志全

趙瞻字大觀其先亳州人父剛太子賓客徙盤屋瞻舉進士英宗治平初除侍御史上疏英宗稱善久之詔內侍王昭明等四人爲陝西諸路鈐轄瞻以爲宜追還內侍責成守臣章三上言甚激切又請罷京使專委宿將夏人入侵慶帥孫長卿不能禦加集賢院學

士瞻言長卿當黜不宜賞京東盜賊數起瞻請易置曹濮守臣之不才者未報乃求退力言追還昭明等英宗改容納其言時議追崇濮安懿王中書請懿王稱親瞻爭之已而皇太后手書尊王爲皇瞻入對曰陛下爲仁宗子而濮王又稱皇考則是二父二父非禮貶通判汾州熙寧三年爲開封府判官神宗問青苗法便乎對曰青苗法唐行於季世擾攘中括民財誠便今欲爲長久計愛養百姓誠不便初王安石欲瞻助已使其黨餌以知雜御史瞻不應由是出爲陝西轉運副使元祐三年擢樞密直學士簽樞密院事明年同知院事卒

諡簡懿

宋史本傳

王吉甫字邦憲同州人舉明經練習法律試斷刑入等爲大理評事累遷刑部員外郎南郊起幔城役卒急於畢事董役者責之曰此殆類白露屋耳卒訴之吏當非所宜言論死吉甫謂不應死遂求

對神宗怒吉甫從容敷陳不少懼帝爲霽怒其人得釋蘇軾南遷
所過郡守有延館之者詔鞠之吉甫議當答宰相章惇不悅吉甫
曰法如是難以增加成罪卒從答太倉火議誅守者十餘人亦爭
之皆得不死尋知梓州轉運使欲增折配以取羨餘吉甫謂僚曰
民力竭矣一增之後不可復減吾寧貽使者怒忍爲國斂怨爲基
禍哉竟却之以中大夫卒

宋史本傳

張舜民字芸叟邠州人中進士第爲襄崇令王安石倡新法舜民上
書言便民所以窮民強內所以弱內富國所以盛國時人壯之司
馬光薦其才氣秀異剛直敢言以館閣校勘爲監察御史上疏論
西夏疆臣爭權當興師問罪左遷監登聞鼓院徽宗立擢右諫議
大夫居職才七日所上事已六十章陳陝西之弊論河朔之困言
多凱峭以龍圖閣待制知定州坐元祐黨籍商州安置復集賢殿

修撰卒舜民慷慨喜論事善爲文自號浮休居士紹興中追贈寶

文閣直學士

宋史本傳

何常字德固京兆人進士第爲開封府兵曹歷熙河轉運副使議者欲貸民金帛使入粟塞下常曰車馬轉輸民力已病然未至於死亡者粟自官出而民無害也今強以金帛使自入粟懼非貧弱之利熙帥及監軍劾之貶秩徙成都路中使持御札至今織戲龍羅二千繡旗五百常奏旗者軍器之飾敢不奉詔戲龍羅唯供御服日夜一匹歲不過三百有奇今乃數倍無益也詔獎其言爲減四之三除直龍圖閣轉通議大夫謀告夏人多築堡柵朝議出兵牽制常言羌人生長射獵今困於版築可以拱手待敵無煩有爲也從之終右文殿修撰

宋史本傳

雍冲洋縣人紹聖時太學生章惇變更政事追削元祐黨人冲曰士

尚可以仕乎乃上書數其罪乞斬之有旨移興元府張浚試吏

元與之交好後隱居不仕

漢中府志

蕭貢字貞卿咸陽人大定二十二年進士調鎮戎州判官擢監察御史遷北京轉運副使親老歸養左丞董師中右丞楊伯通薦其文學除翰林修撰上書論比年之弊人材不以器識操履巧於案牘不涉吏議者爲工用人不務因材授官惟泥資叙名器不務慎與人多僥倖守令不務才實民罹其害伏望擢真才以振澆俗核功能以理職業慎名器以抑僥倖重守令以厚邦本然後教化可行百事可舉矣詔詞臣作唐用董重質誅郭誼得失論貢爲第一賜重幣四端貢論時政五弊言路四難詞意切至改治書侍御史遷國子祭酒兼太常少卿與陳大任刊修遼史改刑部侍郎歷河東

北路南京路轉運使御史中丞戶部尚書興定元年致仕卒諡文簡貢好學讀書至老不倦有注史記一百卷

金史本傳

程震字威卿東勝人與兄鼎俱擢第震入仕有能聲興定初召百官舉縣令震得陳留治爲河南第一召拜監察御史彈劾無所撓時皇子荆王爲宰相家僮席勢侵民震劾奏曰荆王不能上贊君父同濟艱難顧乃開納貨賂縱奴隸侵漁細民諸所不法不可枚舉陛下不能正家而欲正天下難矣於是上責荆王出內府銀以償物值杖大奴尤不法者數人未幾坐爲故吏所訟罷官震爲人剛直有材幹爲御史臺綱大振以故小人側目不能久留於朝士論惜之

金史本傳

孟攀麟字駕之雲內人日誦萬言能綴文時號奇童金正大七年擢

進士第爲陝西帥府詳議官遂家長安中統三年授翰林待制同
修國史至元初召見條陳十七事大抵勸上以郊祀天地祠太廟
制禮樂建學校行科舉擢守令以字民儲粟米以贍軍省無名之
賦罷不急之役百司庶府統於六部紀綱制度悉由中書是爲長
久之計世祖悉嘉納之又嘗召問宗廟郊祀儀制攀麟悉據經典
以對時帝將親祀命攀麟會大常議定禮儀攀麟夜畫郊祀及宗
廟圖以進帝皆親覽後以病請西歸帝令就議陝西五路四川行
中書省事四年卒贈翰林學士承旨諡文定

元史本傳

張訥藍田人少有志行歷官監察御史立朝論事謇諤不避權貴諫

草一出時論歸美家居孝友嫺睦舉動必協於道關中學耆翕然

宗之

賈志

楊欽雲陽人三歷風憲俱有政聲

賈志

王亨朝邑人爲縣募官持守端楷每與時尚同異遂棄去不仕由義
亨之孫爲御史累有獻替從幸上京抗章論衛士縱牧踐民田行
營肅然馬志由義至大元年除彰德路總管值旱隨禱而雨逾年又
旱請於朝得錢一萬緡易米以濟饑民累章奏免屬邑稅絹稅米
營建廟學民不知費徵爲兵部侍郎河南通志

明

文振三水人洪武初貢士任御史賦性剛直權勢莫撓京師以鐵面
號之太祖命督修文華武英諸殿嘗以言見謫充吏三日復諫上
怒甚將殺之振顏色不變上奇而釋之尋擢河南僉事蒞政廉能

陞雲南交趾廉使卒

賈志

土朴同州人洪武乙丑進士授吏科給事中改四川道御史性戇直
數以諫忤旨一日以奏事爭辯上怒命斬之至市復赦還曰改乎

朴曰臣無罪不宜戮有罪又安用生之上復命斬之出過史館呼
曰學士劉三吾某月日皇帝殺無罪御史王朴行刑者復命上怒
其不先聞俱坐死賈志

本恭三原人洪武中貢士累擢僉都御史彈劾不避權貴有讒恭者

上私幸其第恭妻紡綿恭方荷鋤園中遂誅讒者而益重恭三原志

墨麟字士禎高陵人洪武甲子鄉舉任監察御史風紀大振擢北平

副使永樂初陞刑部右侍郎人不敢干以私進少保卒西安府志

統志云麟以國子生任御史永樂時以守城功陞少司馬卒贈少保諡榮毅與府志互異

邱野鄜州人洪武中以國子生擢御史激揚得體永樂初陞湖廣按

察司副使

賈一統志

馬京字子高三原人洪武十三年進士及第授翰林院編脩永樂初
拜刑部右侍郎未幾卒諡文簡京為人方正有才思立朝多所建

明記雍大

康郁扶風人建文中以貢士任御史時議削奪燕藩上疏切諫不報

歷官四川臬使持憲嚴明人不敢干以私

賈志

雷恭字時敬澄城人永樂乙酉舉人授交趾道御史正直謇諤不避

權貴出按山西風裁凜然墨吏望風解綬天順初同御史楊瑄等

極論石亨擅權英廟怒謫戍遼東

同州志

李節字文度三原人永樂中以明經授給諫論事務存大體陞四川

副使振肅風紀氣節凜然宣德間都督陳懷鎮四川擅作威福節

抗疏劾其不法數事懷竟以是敗衆服其剛介尋陞按察使

三原志

李錫字天祿咸寧人永樂戊子解元授蒲州學正毅然以師道自居

出其門者多成令器陞給事中整飭典章小心愼密得近臣體轉

通政使封駁章奏通達下情雖倥偬繁劇條理井井

賈志

唐或朝邑人永樂中以經徵爲給事中陞通政使剛直敢言有論

劾必著緋衣諸大司每早朝使人候或長安門外見或緋衣各取素衣角巾待罪有譖或貪者上怒下獄死命籍其家惟襲布斗粟而已召或妻問曰或無俸金耶妻曰或俸金寄通政司庫已而司上或庫金上悟立誅譖者復其官

西安府志

段信字宗實三原人正統丙辰進士任杭州司李廉介不撓獄無冤滯擢御史巡按雲南滇人有詩曰擔頭不帶滇南物只插梅花到處香繼按直隸監軍口外所至風節著聞彈劾不避權貴陞僉都出守紫荆關邊境寧輯

三原志

楊祥商州人正統丙辰進士歷任監察御史彈劾無所避奸豪咸憚之居官十年環堵不飾

西安府志

白行中字大本清澗人正統甲子鄉薦知襄垣安肅拜監察御史按

廣東攬轡有澄清之志羣吏貪墨者輒解綬去後守松江以卓異
聞總兩淮鹺政轉運不匱尤以清白自持

延安府志

行順字致和行中

兄正統戊辰進士歷官湖廣巡撫亦以風節著

清澗縣志

楊鼎字宗器咸寧人正統四年進士授翰林編脩以才推改監察御

史治兵交州陞工部右侍郎天順二年轉左中貴牛玉議欲轉江

南折糧銀入實內帑以他物充武職俸鼎從容議已之成化四年

代馬昂爲戶部尚書延綏用兵廷議預徵邊餉鼎言黃河漢唐漕

運故道間雖稍險然三門而上小河可達延綏其迹尚在苟貯糧

水次溯流徐運何所不濟疏上請身督之竟齟不行鼎在官力清

利孔所題覆持正不回事出上旨亦不曲徇所立稅監二法戶部

遵守之致仕歸卒諡莊敏子時暢官至太常少卿

名山藏

裴斐字成章渭南人正統丁卯舉人官御史立朝有風裁出按遼陽

將領整肅陞湖廣僉事歸紹宗字伯修斐孫以進士除海門知縣遇事敢爲無所畏避武宗南巡當道使署江都事時張忠江彬等橫索有司莫敢犯紹宗獨與抗不少屈比駕旋省費數萬緡尋擢給事中直言無諱會有大禮事紹宗抗疏數千言反覆辨難詞嚴義正詔下錦衣獄以掠重創甚卒貧不能治喪時稱忠清

渭南志

郭宗舜岐山人有膽畧涉獵書史正統時有羣盜聚劫宗舜以計擒之有司上其事授巡檢歲凶軍民流離詔下求言宗舜伏闕上十事極論時弊指斥權要未復繫之以詩英廟採行焉再授鄠縣巡檢會御史楊綱夜經其處宗舜盤詰如法綱怒劾以輕侮風憲宗舜亦抗章辯奏上直之及土木之變入塞省候進衣物後論功陞後軍都督僉事

鳳翔府志

李著鄆縣人由太學生授廣西道御史當英廟北狩景帝以太后令

監國時國勢危疑漸起即真之議著力言宜輔太子以成周公之
美疏詞稱殿下言頗切直帝再三詰責終不屈帝怒殺之英廟復
辟令以禮改葬云同邑岳嵩亦以太學生任兵科給事中以言事
忤旨謫福建布政司經歷曾孫宗知密縣有聲郿縣志

閻佐字文輔商州人天順甲申進士授御史巡按兗豫閩蜀直聲大
著與中官勘事不合中官素知其直謝不敢逆陞浙江副使有以
私干者却之遠近震攝子宇字大啓弘治間進士知曹縣有績馬志

張鼎字大器咸寧人成化丙戌進士授刑部主事上言邊備曰陝西
三邊腹裏俱有鎮守總兵巡撫都御史等官遇事各爲可否有警
不相救援宜推文武兼濟者一人總制三邊副將以下悉聽調遣
則事體歸一詔從之邊境賴以稍寧咸寧志 鼎歷官戶部侍郎初知
太原除豪黠孟氏一家九人按察河東威名遠著巡撫保定禦流

賊築牆數百里自內邱直達京畿境內肅清

賈志

魏秉孝字執中蒲城人成化丙戌進士官御史遷山東副使政績丕著憲廟時嘗直南郊糾儀上言人君所畏者惟天今當郊祀宜肅恭收斂以精對越之誠不可令教坊諸俳在左右時以為名言

蒲城志

張進祿字天錫清澗人成化丙戌進士授御史正論危言彈劾不避權貴巡按山西時掄次有巨俠魚肉小民廉知之悉寘於法境內遂安以直道罷歸子鸞鄉舉兩令巖邑皆有能聲

賈志

李俊岐山人父賜生俊六月而卒母曹氏矢志守節俊稍長安貧力學登成化己丑進士官吏科都給事中彈擊奸回權要斂迹嘗言事恐忤旨置棺櫬待命後出為湖廣叅議山西參政所至有德政

及人

鳳翔府志

張琛宜川人成化乙未進士授行人歷吏科都給事中廉潔自守
劾不避權貴疏數上皆切時弊陞太僕少卿尋卒

延安府志

李善字宗元隴州人成化戊戌進士授行人擢御史是時太監梁芳
怙寵市權乃上疏極言中貴側目按遼東時韋太監縱舍人侵漁
軍餉聞善至即相顧斂手又劾都督王鎧孫貴皆以不職罷壽寧
侯張鶴齡負勢族子漁獵小民謗怨載路善曰此教授侯門者弗
嚴也乃叅其教授姚某侯家以罪發戍者若干人遠邇皆縮舌侯
陰間之出爲河南僉事河決張秋都御史劉大夏督修之善爲相
度水勢開賈魯河改河南注築塞黃陵決口斷水東流卒底於成
陞湖廣叅議何淮等僭號攻陷城池善以計擒之荆襄王景陽以
左道惑衆善捕送京師餘悉不問擢四川布政使番人久肆擄掠
善移檄宣布朝廷威德番盡降拜南京都察院右副都御史以整肅

風憲為已任陞南工部尚書移病去

志

張鸞字應祥咸寧人成化辛丑進士授大名知縣為政廉平調南樂歲旱民饑流亡過半乃力請賑貸民以獲蘇擢御史巡視居庸條陳防邊數事悉報可出按四川先後奏議松潘諸處及成都諸郡縣添設裁革事宜皆卓然為經遠之績累遷僉憲時御史王時中巡按大同忤權貴欲置之死鸞力解救之巨璫張璿掠奪民產往勘事得直以田產還之民轉刑部右侍郎以忤劉瑾致仕歸

賈志

閻价字允德隴州人成化丁未進士由庶吉士授浙江道御史弘治五年查盤松茂邊儲巡按河南值劉瑾亂政价特疏劾之事雖未

行時論歸美後陞四川參議致仕卒

賈志

虎臣

麟遊人

慷慨有氣節成化末貢入太學適聞萬歲山架棕棚以備

登眺臣上疏極諫憲廟奇之祭酒費闇不知也懼其賈禍會六堂

鳴鼓聲罪以銀鐙鎖之俄官校至宣臣至左順門中官傳旨勞之
曰爾言是棕棚拆卸矣命吏部予七品官閭聞而大慚臣知雲南

磻嘉縣事卒於官

郊外
農談

袁澤字汝霖醴泉人弘治己酉舉人兩署學政矩範尊嚴諸士翕然
仰之繼擢御史糾劾奸惡無所顧避清理河南軍戎兼刷文卷並

造軍器俱有成法以疾歸

馬志

王綸字汝言扶風人弘治己酉舉人初任真定知縣適擢璫奉使過
州縣辱官吏笞郵卒張甚既至真定綸直入傳舍以帶繫之縛其
左右搜簡囊橐欲聞於朝璫伏罪乃已尋召入爲御史出巡四川
此璫適爲鎮守斂戢不敢恣肆時藍鄙作亂督臣洪鐘日事宴飲
露章劾罷之後掌十二團營會逆璫劉瑾卹靈寶許進捏旨命綸
往按治綸力爲昭雪瑾怒方遣逮而瑾敗由此直聲震中外擢浙

江叅政未赴卒

賈志

王𢇇字汝器朝邑人弘治庚戌進士授戶部主事清理京衛牧馬草場畜牧事宜時房山豪民侵牧地𢇇自按之豪民有奧援𢇇不顧曰法如是也爲員外會詔求直言疏列五十餘事尋爲郎中督儲遼東條奏邊儲戰陣方畧過山海關憲臣以誘殺勘邊士罪𢇇疏言實非誘殺急行功賞以厲士心巡歷諸倉敷陳便宜七事後忤大司馬某謫阿迷州同知擢守和州辨冤抑導水利後爲蘇州同知以直道忤時遂免歸

朝邑志

東思恭字進賢華州人弘治癸丑進士拜兵科給事中敢言直諫縉紳憚之如劾都指揮彭麟輩附勢南京祭酒劉震貪污天下快焉尋奉命給賞京衛軍士處置得宜會雲南夷酋猛密相仇殺上命思恭案驗事平方擬奏報思恭感瘴癘卒於滇南

西安府志

尚衡字一中同州人弘治丙辰進士拜工科給事清寧宮災衡上封

三

事以爲天子倦勤所致會詔求直言兩上書各陳四事其後又造
延壽塔衡上書極諫上爲改容罷其役已遷吏戶二科數劾論諸
大臣不法事武宗即位上封事二十條詞皆切直於是當路銜之
出爲浙江右參議歲饑賑貸多所全活陞左叅政復改山西河東
道下車戢橫藩擒巨盜移守興寧會流賊攻太原鋒甚銳時官兵
已調防澤潞衡募勇壯嚴城守又檄材官設伏盤駝谷中防賊南
遁賊偵知卒逸去巡按素不喜衡至是劾其玩寇衡亦上書自理
皆左遷衡遷漢陽知府至郡旬餘卒衡負志節不能下人居朝勁
直敢言廷臣無不敬憚及見妒外補氣不少降嘗入賀時逆瑾用
事惡人高憤或令衡暫易衡憤曰丈夫寧爲一刑餘改度乎其特
立類此子班爵字宗周少英敏好學精研理窟隨衡在浙衡令師

事王文成故所詣益遽舉弘治甲子鄉試任安居令剛果勤勵
舉民安季子班命以明經丞阜城以躓直不阿上官棄職歸人謂
其不負家訓焉

同州志

周熊字應文長安人弘治丙辰進士正德間按滇任法不少貸一時

貪墨望風解組

雲南通志

楊武字宗文岐山人弘治丙辰進士知淄川縣鋤惡弭盜理冤滯課

耕織積倉粟拓學規興詩書賑貧乏疏淄河灌田利賴甚溥召拜

監察御史按河南正德初按順天諸郡縣時劉瑾用事事多牽制

武通達下情宣布朝廷德意一切敷陳無所顧避擢大理寺左寺

丞勘視大同邊務彈劾屯田不均軍役耗損諸弊政不少貸超拜

左僉都御史巡撫宣府罷歸

賈志

石祿字君錫華州人弘治己未進士拜南給事中卓有建論權豪斂

跡陞山西僉事去淹獄賑饑饉又嘗解寧武關圍晉人深賴之丁

艱歸再補四川僉事平夔蠻有功終四川叅議

華州志

吉時字惟可長安人弘治壬戌進士由庶吉士改給事中建言忤瑾

謫死

西安府志

張璉字汝器耀州人弘治壬戌進士授行人選爲御史時劉瑾數以

禮意招璉璉不往瑾怒欲中傷竟無隙巡按湖廣治其黨不法事

瑾怒甚將逮繫會瑾敗不果遷按察時晉府儀賓某以殺人成獄

武廟駐蹕太原縣君重賂江彬矯稱天語赦儀賓死璉曰憲臣爲

天子守法今天顏咫尺璉未奉明詔顧信公口傳耶彬語塞尋陞

侍郎奉勅督宣大糧儲數有論奏忤權相自劾乞罷黜乃以左侍

郎致仕

耀州志

田登字有年長安人弘治乙丑進士任刑曹適武宗幸南海子五日

太后何上亦不之罪也後官至參政

長安志

秦偉字世觀三原人與馬谿田講誠敬之學登弘治乙丑進士授戶部主事督宣大邊餉監軍張永欲賞所私偉不與永竟阻出守保定有中貴占民田舍偉執奏不法狀中貴斂跡遷山西叅政懃直愈著令行禁止弊絕風清撫按忌之罷去

賈志

王九峯字壽夫鄆人正德戊辰進士授御史巡視居庸開險阻簡行

伍利器物時練習衛官怠惰侵漁者必懲主將貪懦者必斥按順天旌廉去貪畿內大治其年秋駕幸居庸九峰率同列諫止前後三十疏不允出爲金華知府德政茂著嘉靖甲申擢山西副使備

兵偏頭關乞歸卒

賈志

韓邦靖字汝慶朝邑人正德戊辰進士除工部虞衡主事部檄監收

十庫時宦勢正熾邦靖至庫羣宦不爲禮乃自坐前席署案如舊
禮又檄監收黑窯廠亦宦者主之弊尤甚邦靖至廠乃躬自視
秤羣宦曰吾輩厚費而來此欲何爲邦靖弗顧次當浙江抽分下
令非巨材若竹木成器者皆免徵比代正課且不足部科皆以法
奏邦靖邦靖亦自劾宰臣知其事得原已陞員外郎檄往直隸陝
西山西查徵歷年匠班值見其民貧甚建言宜罷徵不許以乾清
宮災竟罷之天子方以災異下詔求直言邦靖歸上疏天子震怒
繫錦衣獄給事中李鐸率衆論救乃奪官爲民世宗初起擢山西
布政司叅議分守大同革奸弊恤民隱權豪斂迹又以邊陲之地
兵糧所係分守官故事無印乃上疏請給關防時朝廷修定策功
賞邦靖以兄終弟及天叙所宜諸臣何功之有亦上疏論皆不報
大同歲饑又入奏乞發內帑賑濟下部不許且駁之邦靖復抗

疏論列部司頗不悅邦靖遂上疏乞休疏拜即去邦靖矜名節孝
弟友恭尤爲切至學有淵源自幼即以經濟爲志冀北父老誦其
行事有泣下者

苑洛集

王元凱字堯卿盩厔人正德辛未進士拜兵科給事中時戶部郎王
崇慶以言事繫廷尉元凱上章論救上怒詔詣左門對狀元凱
曰主事郎官因言繫獄凱諫官以言得罪固其分也第權奸誅滅
未久朝廷不可復罪言者以滋禍端上感悟釋崇慶時中貴用事
公卿皆因闕說元凱切諫不報乃力疏懇致仕弟元正字舜卿凱
同榜進士官翰林院檢討武宗幸宣大述五子之歌以諷以議大
禮謫戍茂州卒

西安府志

東郊字希宋華州人正德辛未進士歷官浙江道御史值武廟將幸
居庸抗疏諫止時錢寧怙寵納賄據實論奏江彬竊弄威福擾害

郡邑郊力爲禁止奸黨邨恨共肆萑菲左遷潞州判官致仕

西安府志

劉儲秀字士奇咸寧人正德甲戌進士授刑部主事歷郎中多所平

反錄囚蜀中全活尤衆戊子擢山西提學副使崇雅黜浮士風丕

變晉右副都巡撫遼東整飭邊方治績茂著內擢戶部尚書總督

倉場督理西苑農事時陶仲文方幸至以三孤兼宗伯儲秀於仲

文獨不爲禮尋改兵部尚書例疏辭疏中語及復套事嚴嵩方借

復套謀陷夏言因與仲文交構上前遂削籍

馮少墟集

張原長安人正德甲戌成進士授吏科給事中即上疏言十二事曰

正守令擇將帥理刑獄汰冗食省征斂減工作恤士卒明賞罰禮

大臣開言路崇天道進德學忤旨降貴州新添驛丞學者聞原名

莫不裹糧負笈而從經所指授輒充然有得士風爲之一變嘉靖

改元復召兵科給事中原感知遇益以諫諍爲已任言皆剴切凡

論國家大計及進賢退不肖詞嚴色正上多嘉納三年七月以諫
大禮被杖死闕下先是原有停司禮監請乞一疏中貴人邨之杖
獨重竟至不起穆廟初奉世宗遺詔復原官錄其後

馮少墟集

劉琦字廷珍洛川人舉正德甲戌進士授行人擢兵科給事中敷陳
六事議論剴切復極言差放冬衣布花之弊皆報可錦衣衛多權
右冒領官銀取利琦廉得其情寘於法他如峻宮牆之禁嚴宿衛
之舖一劾而中官逮罪者四十人未幾奉命清軍條奏三十事咸
切中時弊大臣及中官凡有請囑琦必劾治之雖事干勲戚不顧
也

賈志

妖人李福達坐死其子以燒煉術往來武定侯郭勛勛為福

達代辨給事中劉琦劾勛交通逆賊明受賄賂福達既應伏誅勛

無可赦之理帝以劾勛者為朋姦陷正命逮繫詔獄戍邊穆宗立

遇赦乃還

紀事本末

李朝綱字振之武功人正德丙子舉人初爲聞喜令清潔自持憲司有惡其形已者因查錢穀突入縣署親檢筭中惟書一帙公服一襲綱妻紡績以馬矢爲爨憲司嘆服首薦之擢御史巡歷所至凡有見聞必入告墨吏望風而化遷岢嵐副使清直猶昔多所建白竟以執法弗諧於俗罷歸

武功志

胡侍字承之咸寧人正德丁丑進士歷官鴻臚少卿時追尊獻帝議者力辯兩考之非侍上言祖訓兄終弟及蓋嚴嫡庶防覬覦爾魯嬰齊不受命歸父漢病已不受命昭帝何以受命爲哉唐睿宗不當兄中宗宋太宗不當兄藝祖以其爲君也不當稱兄則不當稱伯明矣上怒出爲潞州判官

西安府志

許宗魯字東侯咸寧人正德丁丑進士授雲南道御史刷卷蘇徽畫按諸大猾寘之法所入銀穀至百數十餘萬世宗初巡按宣大時

將卒素驕悍宗魯罪其甚者將卒帖然先是太監劉祥乾沒邊餉以萬計罪止罷鎮宗魯請下祥於獄祥大懼即如數抵償御史曹嘉論諸大臣不法事有給事希大臣意劾嘉宗魯力奏嘉無罪獲免至劾武定侯郭勛太監蕭敬兩疏言尤切至宣大故有大邊正德初以地遠棄不守宗魯行邊奏請補築已視湖廣學政士風不振未幾巡撫保定覈驛傳均徭賦築堤捍滹沱河有功賜璽書旌焉庚戌以都御史駐昌平修邊牆三百里墩堡數百陵寢以安移撫遼東增鹽課歸民田之占於諸軍者遼人甚賴之致仕歸賈志從

坤字載陽宗魯孫中萬曆乙酉鄉薦初仕霸州守潔已奉公不畏

權璫州人頌之擢臺中以耿直左遷淮安府水利同知開淤治潢

漕艘飛渡以功擢南工部員外

咸寧志

許忠洵陽人正德丁丑進士初授行人選山東道御史敢言不避以

議大禮忤旨謫判亳州卒同時議禮不阿者有御史來聘三原人
郎中趙儒華陰人大理評事王光濟商州人皆忤旨受廷杖聘謫
丹稜令除虎患民歌思之陞四川按察使儒歷叙州永州知府力
行教化入覲以覲直忤冢宰罷光濟官歷山左運使治亦有績

賈志

王懋字昭大咸寧人正德丁丑進士授行人以諫止南巡廷杖左遷

國子學正嘉靖初詔復行人尋拜監察御史時廷臣議禮不合相

繼去位有杖死者懋上疏論救謫典史數遷至懷慶知府卒

西安府志

杜鸞咸寧人正德辛巳進士授大理評事李福達之獄郭勛居間席

書助之鸞請將二人先正國法徐命多官集議疏上鸞逮治削籍

西安府志

王用賓字允興咸寧人正德辛巳進士授翰林院編修歷清署三十
餘年以講官侍經筵啓沃開陳世宗每目禮之晉秩宗伯值穆宗

在裕邸誕嗣並奉詔議孝烈皇后祔廟兩事時際諱忌朝臣率多異同公力持宜稱皇孫主祔廟議先後疏入俱稱旨以忤嚴嵩置

留京冢宰

咸寧志

張緯字文之咸陽人正德辛巳進士嘉靖初擢御史時有以佛老進者緯抗疏直諫不報江南民鄧愈唐爲仇家誣執繫獄數年不決緯立剖雪之巡視居庸諸關所至練武修備發奸摘伏邊人頌之大同有變緯奏恩浮於威無以示戒宜有震動以彰天討上納之奉命按遼東會疾卒貧不能具棺殮

賈志

劉仕字以學中部人正德辛巳進士授刑部主事世宗立欲考興獻仕伏哭奉天門上大怒廷杖三十不死久之起爲員外郎歷郎中獻獄山西御史馬錄質以張寅罪狀仕言寅爲李福達不疑乃移寅詔獄以武定侯郭勛庇寅劾之廷杖謫戍柳州穆宗即位以遺

詔起太僕少卿謝病不就子光升官新泰知縣剛正不阿有父風

賈志

李恭榆林衛諸生例授秦府典膳正德十三年武宗西狩恭抗疏請
誅權奸江彬聞之矯詔下行在錦衣獄煅煉死之子大興逮繫詔
獄嘉靖改元巡撫姚鎮奏恭死於忠贈紀善大興亦以清介稱

延志

維昂字仲俛三原人嘉靖癸未進士累擢吏科給事中未三年疏凡
數十奏直聲著聞出為四川僉事歷河南布政使陞巡撫奏議條
陳期月間六十上徽藩不道昂抗疏劾之被逮廷杖斃闕下

三原志

李宗樞字子西富平人嘉靖癸未進士授諸城令邑多衛弁巨室奪
民田宗樞按治歸故侵地縣隣海風稱盜藪宗樞在邑三載盜皆
屏跡戊子擢御史宣大有警敕樞按之陳邊務十一事詔用之邊

境果寧抗疏論總憲阿附及少司馬副都不法事皆坐免出爲
州兵備遷河南叅議轉副使上南巡擢按察使分督扈從之役中
官斂戢拜僉都巡撫河南素性堅直廉正無所阿徇尤軫民隱陳
災疫請賑恤凡章奏入告期於通達下情無所隱諱多得請中州
民甚德之以病歸

富平志

劉璣白水人嘉靖乙酉舉人任井陘令歲饑多方賑濟上疏請鎔佛
鑄錢以救荒不報因執辨疑獄忤臺使左遷武昌教授楚王謁廟
由中道璣直言非禮時論韙之

耀州志

朱綬南鄭人嘉靖癸未進士初以行人出使卻徽王之餽爲御史多
所論諫時兵馬司門內湧血莫敢上聞綬上疏規諫言甚剴切中
外韙之卒之日囊空不能治棺具

漢中府志

楊爵字伯修富平人家貧年二十始發篋讀書兄爲邑掾以他累還

爵並逮獄爵從獄中上書白兄寃令見書立出之舉嘉靖八年進士授行人奉使楚藩還朝時上方議禮爵言臣至湖廣見百姓多菜色假令周公禮文盡行抑何補於饑饉之艱上爲下疏發賑改御史念母乞終養母卒廬墓三年起補御史疏言大學士夏言欺天罔人翊國公郭勛巨惡大奸凡此任用匪人皆足以失人心而致危亂又請止土木之功開諫諍之路屏邪妄之術以慰人心以祈天祐疏入上大怒逮繫詔獄杖幾死五年上修元教神降於箕請宥爵上釋之未彌月而上爲箕神造臺尚書熊浹極言不可上曰吾固知釋爵諸妄言者立至矣復逮還繫獄爵抵家僅十日也又三年內殿火上於火光中聞神語呼爵名請釋之於是始釋爵歸二年有大鳥止於舍爵曰楊伯起之鳥至矣兆其在我乎越五日無疾而卒

明史竊本傳

隆慶初贈光祿卿萬曆中謚忠介

名山歲

呂應祥字子和涇陽人嘉靖壬辰進士以行人選吏科給事以諫諍
爲已任嘗曰朝廷以言官爲耳目苟稍有顧忌即蔽明塞聰豈朝
廷設官意乎會京師地震上書言汰冗賑貧倡勇恤獻節賞五事
尋奉命監草場疏發司場太監通商減芻奸狀覆宣大邊餉盡得
登耗出入之實劾都御史以下若干人條塞下便宜十事皆嘉納
焉上幸承天祔皇太后顯陵應祥以禮科都給事中從議禮多所
匡正時選官僚多賂進者應祥言太子國之儲副師友必慎其選
願罷諸賂進者會推一時賢俊疏上觸執事者奪爲民賈志
高節字中立西安後衛人嘉靖乙未進士知襄陵擢南給事中戇直
有聲出知河南衛輝府以廉介稱中丞某禮接少違即掛冠去一
日直指使者往候節方冠襪襪荷鋤自耘留坐惟麥飯一盤人服
其古朴云

西安府志

段朝宗字公見朝邑人嘉靖乙未進士授中書舍人拜兵科給事中遷禮科巡視京營條奏防秋八事多見施行時薊督多奸利事朝宗抗疏論之又疏京營士馬不得假借市恩以故怨者多飛語出知岳州時婺源盜方張朝宗檄示禍福盜立時解散復作諭解數十條訟者至庭反覆開導皆悔謝邑人立祠祀之

朝邑志

楊宗氣字鐘山延安衛人嘉靖辛丑進士授庶吉士改給事中丰裁峻厲多所建明世宗時爭大禮上怒廷杖之議謫戍上怒稍釋左遷山西督糧道剔釐宿弊尋擢山西巡撫振綱飭紀下詔褒錫兼節制四省吏畏民懷時中官用事宗氣獨不附璫人深銜之遂乞歸

賈志

王鶴字子臯長安人嘉靖甲辰進士爲行人奉使朝鮮饋遺盡却遷工科給事中上疏論時政忤旨廷杖當嚴嵩柄國時入爭出其門

鶴持正不阿人服其介

長安志

張鍊字伯純武功人鐫弟嘉靖甲辰進士以行人選刑科給諫疏奏

無所忌以忤權要被廷杖幾死出為湖南僉事甚有德政

賈志

鄒應龍字雲卿長安人嘉靖丙辰進士授行人擢御史

長安志

嘉靖四

十一年五月以御史鄒應龍為通政司叅議時嚴嵩眷遇日隆言

者或死或戍應龍欲具疏一夕夢出獵見一高山射之不中東有

培壘樓俯平田有艸米覆其上一矢中之醒而悟曰此小兒東樓

之兆也遂上疏劾世蕃數其通賄敗行諸不法狀乞置於理因及

嵩植黨蔽賢溺愛惡子且曰如臣言不實願斬臣首以謝世蕃父

子帝覽之心動命嵩致仕而下世蕃於理擢應龍嘉其敢言

紀事本末

應龍後歷兵部侍郎巡撫雲南以忤江陵致仕

賈志

王言字斗廬南鄭人嘉靖戊午解元初仕徽州教授陞國子博士考

選御史殿中執法有百折不同之力觸時相外轉安綿道僉事西蜀鎖鑰賴以嚴飭生平岳立人難干以私賈志

孫代字紹甫扶風人嘉靖己未進士除行人使周肅兩藩不受贈遺擢御史首糾吏部郎某僞學文奸削其籍穆廟視牲南郊戎服乘馬以出具疏爭之上怒甚然卒是其所請出按四川平九絲都蠻督學江右所掄皆知名士轉浙江叅政謝疾歸賈志

李復聘字叔徵盩厔人嘉靖壬戌進士除聞喜令繩奸吏捕劇盜三年授南京廣東道御史抗疏論時事劾執政一勲貴一薦有望大臣十風裁赫然出爲四川僉事四川盜証甚復聘推誠安輯盜乃散尋陞參議移疾歸用薦起分部鄖襄陞副使治兵蘄州以疾卒

盩厔志

雒遵字道行涇陽人入籍三原嘉靖乙丑進士任給諫劾權璫馮保

忤江陵謫浙江照磨縉紳想望丰采轉大僕卿巡撫四川有疏稿
集諫垣奏議行世子仁字少經萬曆癸未進士官大理評事時神
宗倦勤進四箴以規聖德語觸上怒廷杖削籍忠直之風父子濟

美

三原志

孫丕揚字叔孝富平人嘉靖中進士授行人時分宜焰熾走其門者
如市丕揚獨謝不往壬戌授御史同官鄒應龍糾分宜子世蕃諸
不法狀詔丕揚籍其家士論快之陞大理寺右丞時新鄭用事以
夙憾嗾其黨詆之坐落職新鄭罷去以臺臣薦起巡撫保定增設
紫荆關邊牆一千九百餘里金湯屹然以不能事權璫馮保忤江
陵引疾歸又以薦起應天府尹轉戶部左侍郎丕揚風節彌高辭
疾不赴辛卯以撫按會薦起刑部尚書大同變起上入蜚語逮總
督魏學會乃抗言學會為國家剪除元愆忠烈茂著大功垂成用

肘掖萋菲遽加挫辱恐傷天下忠臣義士心上是其言釋勿問改
都察院左都御史命各道御史會集諸事宜為書名曰巡方總約
至今諸御史奉為功令陞吏部尚書告歸再起吏部時黨議方興
丕揚抗疏極論而諸臣互相傾危國事日壞乃掛冠歸里性亢率
爽豁與人交不設城府不念私怨凡國家大政如九邊河漕皆確
有碩畫念天下安危托於諸撫臣再柄銓衡獨以遴選撫臣為兢
兢一時建牙擁旄皆卓然為世名臣賈志孫恭介為冢宰時文選員
外薛芳者韓城人萬曆壬辰進士素有直聲恭介喜曰此為我砥
重銓衡者也一切倚重芳竟以孤直被論歸甲寅起太常卿以慈
寧宮救劉御史弗克發憤卒韓城志

任佩字伯玉高陵人嘉靖中以明經授興平訓導遷肅藩教授藩嗣
性佻達佩嚴其近侍不使私出入多所匡正藩校王應龍兄弟以

事犯王怒甚下佩議死佩封還令旨竟得釋時又有崇王府長史劉遷高陵人德王府長史梁光裕洋縣人皆隨事規諫導王以禮

二王遂有賢聲

賈志

党傑字子興城固人隆慶丁卯舉人性剛果沉毅每以忠孝節義自矢官榆社教諭陞文安知縣循良大著擢南京御史條議江防事宜後因建儲直言見忤時宰左遷東昌知府遂掛冠歸神宗每言党御史疏奏激切內多戇語實有可採欲大用之而傑卒

賈志

舒鵬翼南鄭人隆慶庚午鄉舉官鄖西知縣以卓異擢御史見事輒

奏人方之朱雲

賈志

劉四科字健菴涇陽人隆慶辛未進士沉毅廉簡持守端嚴由長治令陞吏部主事累擢太僕卿或言牧馬地稅可得數萬金四科三抗疏止之群璫讒阻百端上卒從四科議時畿甸屢年大水四科

請寬舊逋緩并征又請帑金賑濟上疏言天下者陛下之天下也陛下不圖安天下天下將何所寄天下不安陛下又何所寄上嘉其切直咸報可卒於官

涇陽志

盛訥字敏叔潼關人父德本衛指揮洛南盜起勢甚熾德奉檄往勦深入賊壘力竭而死訥時年十七勺水不入口泣請當道發兵勦賊賊就擒乃發喪行禮後登隆慶辛未進士歷吏部侍郎時封倭之議起聚訟盈庭訥抗章言倭不退而求款恐非實情宜控要害集兵糧爲自治計不宜許和以墮其術已果復獮人服其先識云子以弘字子實萬中進士選庶常歷官國子祭酒神宗未引疾歸光宗踐祚起吏部侍郎以弘慨然以鑑才爲已任核名實抑躁競起用廢棄諸賢天下翕然望太平熹宗登極充日講官數陳經義因事開導能以至誠動人主有以奇技淫巧惑上者以弘立斥

之置帝鑑圖說於講筵以資法戒晉禮尚後魏璫竊政朝紳脂韋以弘正色自立孤危益甚歸里後憂鬱而卒

潼關志

白棟字子隆米脂人隆慶辛未進士除東阿令立條鞭法貧富皆以地科差役邑中一切倚辦不煩里甲以卓異徵爲山西道御史抗言直諫忤權貴謫高郵州判官歷遷大理寺少卿以議石尚書事不協上意告歸益自淬厲名節

延綏志

張國祥字角善臨潼人萬曆初進士以理學自任生平言笑不苟歷

官戶禮二垣與楊左諸人同心持正抗論危言每諫草一出天下

爭傳之

賈志

郝士膏字臣水郿縣人萬曆初進士授芮城令有善政擢兵垣直言

敢諫數上封事以忤魏璫謫降後累陞河南巡撫

郿縣志

李三才字道甫臨潼人萬曆甲戌進士少負志節與南樂魏允貞長

垣李化龍以名世相期許允貞爲郎抗掄時相左遷道甫以戶部
郎論救亦譴外自此聲稱籍甚屢遷卿寺以僉都御史總督漕運
加戶部尚書萬曆中中人出筦礦稅橫行恣睢陳奉在淮尤無狀
道甫悉心力與之撻拄牢籠駕馭權譎縱橫神廟用其言撤奉東
胥得安枕

列朝詩集

雷士楨字國柱朝邑人少穎悟有風節六歲時從學外祖韓邦奇容
城楊繼盛盛故師邦奇及以諫謫狄道尉過謁久語士楨從旁竊視
繼盛甚羨之既去謂邦奇曰客洵丈夫哉邦奇奇之謂兒他日當
以諫顯登萬曆甲戌進士初授太常博士拜浙江道御史方三日
即疏論潘晟晟張居正同鄉嘗爲司禮監馮保師居正病亟其黨
謀以晟代詐爲居正疏薦之馮保援於內遂徵晟士楨疏入保持
不下流言且杖天子時已啣居正竟罷不召頃之巡中城宦戚皆

相戒勿觸禁已復巡漕務請託盡絕以疾乞歸卒

朝邑志

劉士忠字純卿華州人萬曆甲戌進士授真定李官三載考績晉江西道御史行部三晉摘諸豪宗不法者會清丈事起議者欲加賦復黃冊額士忠持不可賦得無加越二年再按中州計臣有欲哀中州賦二萬有奇者忠抗疏罷之時天久陰霾忠應詔條上五害上覽之色動辛卯復按順天諸戚畹勛貴相戒毋犯約束累遷右僉都御史總理河道復攝漕撫後廷推南廷尉乞歸卒

華州志

屈灼字青門蒲城人萬曆甲戌進士歷官右通政值火災上疏不報因忤時出爲河南睢陳兵備副使

賈志

孫瑋字以貞渭南人萬曆五年進士由行人考選給事累遷至保定巡撫嚴法令剔蠹弊節浮費廣儲蓄民賴以安陞兵部尚書管左都御史事瑋清廉不受餽遺又性忠純敢直言極諫會星變上疏

言陛下宜猛力同心乾乾夕惕疏入不報遂乞歸天啓元年起南
吏部尚書轉北仍掌左都事尋卒官瑋未卒前一日效古人尸諫
遺書上陳天災迭見民不聊生陛下欲圖治莫如固結人心欲結
人心莫如汲用善類如輔臣劉一燝憲臣鄒元標詞臣文震孟等
宜聽臣言漸次簡擢疏入上竟不報未幾魏忠賢用事斥爲東林
黨人矯旨削奪爲民崇禎初復原官謚莊毅

東林
列傳

王九儀字維邦長安人萬曆丁丑進士爲淄川令有善政徵拜御史
以激揚自任巡視皇城劾中貴人不得跨馬禁中及巡視光祿條
議一疏皆人所難言尋以僉事分巡大梁以病告歸

長安
志

張惟任字希聲潼關人萬曆己卯舉人授巫山令擢御史巡按河南
河官倍調夫役抗疏論置重典巡鹽兩浙條議詳明力清弊竇陞

大理寺卿致仕

賈
志

許守恩字誠齋涇陽人萬曆庚辰進士授鄒縣令有異政擢河南道御史連疏建元良正宮體一時直聲動海內有宦者驕橫不法守恩憤甚振臂毆之諸閹奪氣出爲河南驛傳尋移霸州兼攝天津益振刷無所畏避有撓法者即權倖不少貸以言事觸宸怒逮廷杖下獄久之得釋歸里

涇陽志

甘學書南鄭人萬曆壬午舉人歷官趙州知州礦監肆虐學書抗顏爭止遂誣劾被逮廷杖天啓間事雪贈尚寶寺少卿

漢中府志

王紹先字伯生咸寧人三原籍萬曆癸未進士天性清直任主事監修潞府省費鉅萬奸璫忿甚陷之詔獄尋謫山東運判後復主昌平糧務糾劾奸璫再謫代州同知丰稜愈峻稍復南刑部員外郎家居修全陝通志

西安府志

楊紹程岐山人萬曆癸未進士授庶吉士改御史奏言郊廟不親朝

講不御儲貳不建匹嫡當辨皆言人所不敢言巡滇疏沐舍人僭侈僉謂真御史叅晉藩答逐權要雖直道招忌不悔也

賈志

李應策字成可蒲城人萬曆癸未進士歷任安陽尹舉卓異徵授刑

科給事以倭事糾叅石星沈惟敬陞太常少卿左通政

賈志

楊光訓字汝若渭南人萬曆丙戌進士授南充令補閬中興學賑荒爰書吏議咸自爲狀稱神君焉選山東道御史督課兩淮請罷增引復京掣鹽政一清時三殿災上書極陳時政闕失言多批逆尋改巡漕即奏督河督漕當歸併一臣已按東省稅使馬堂以峻刻激亂光訓單騎往諭罪首事者餘得貸一方安堵復疏罷礦稅備陳蠹國之害長陵明樓災再上修省實政言更剴切遷順天府丞

卒

賈志

劉芳字爾聲渭南人萬曆丙戌進士授行人與魏大中以名節道義

相尚奉使衡鄭二藩謝絕筐篚清望蔚然授湖廣道御史首劾邊境失事諸臣繼陳屯田錢法四事皆次第報可巡視九門鹽法劾私販中官任兆元任二等論如律轂下肅然督長蘆鹽課疏解鹽法專委解官不更煩竈戶並著爲令山東經白蓮亂兵旱相仍請免鄒騰七邑歲額山左以安時逆璫魏忠賢干政芳與十三道合疏論列劾忠賢言甚切直不報督學南畿以內艱歸尋爲璫陷奪職璫敗以臺省薦還原官

賈志

張允升南鄭人萬曆丙戌進士耿介敦樸爲蜀司理力持苦節擢御史以直言名於時倭小西飛乞封疏斥其非鄉居恂恂里人賢之

賈志

武之望字叔卿臨潼人萬曆己丑進士宰霍邱江都皆有能名擢吏部尋主文選直忤當路改兵曹歸里閉門講學遠近爭師事之後

備兵海蓋調永平臺頭營缺餉兵譟城下僉議藉府縣別貯給之
之望持不可曰萬一他營效尤又何以應自臨賊以溫言慰散洊
歷諸卿晉大中丞巡撫登萊劾總兵毛文龍之驕有登撫可裁一
疏以少司馬總督陝西三邊軍務士卒缺餉謀作亂乃廉治其魁
一軍肅然未幾卒於官生平正色立朝不爲朋黨遇事獨斷曾不
依違兩可子二人獻哲天啓進士歷四川副使迪哲辛酉舉人皆
賢達有父風

臨潼志

張企程字維勇洋縣人已丑登焦竑榜進士授山東章邱令慈祥爲
質出以清嚴召入掖垣多所建明乙未河決邳州泛漲泗州祖陵
松柏沒於水天子震恐遣科臣風力者荒度之公受勅詣泗展謁
祖陵上疏曰祖陵腹心也運道咽喉也民生手足也今當以奠安
陵麓爲第一義先調議以聞而漕臣褚袂疏奏導淮正流洩淮積

浮無事分黃糜數十萬金錢公慨然謂目前補救終屬模稜又上
疏曰川壅則潰導則利惟有分黃流以殺其勢蓋上流既分下流
自減泗州積水可消祖陵可保無虞矣又畫便利條爲四事曰議
錢糧議官夫議委任議肅法上下其議一時治河諸臣人人必飭
明年工竣上大悅晉太僕少卿又明年予假旋里以疾卒李遇知撰傳
周傳誦字淑遠西安左衛人萬曆己丑進士官湖廣左布政稅璫陳
奉肆虐民不堪命楚撫劾之反被詔下獄傳誦署撫力抗其鋒後
奉竟解職楚民始得安枕肖像祀焉賈志

楊明盛字熙宇洋縣人萬曆乙未進士任滋陽縣時中官領權稅私
貨甚盛使州縣爲之轉輸民不堪擾經滋陽明盛盡貯於庫劾其
貪虐之罪反爲中人中傷而罷賈志

史記事字義伯渭南人萬曆乙未進士兩任邑令教養兼舉及擢西

臺直言敢諫權貴側目按楚尤多異政遷光祿少卿終以觸忌罷

歸賈志

王豫立字定甫涇陽人萬曆乙未進士歷尹稷山嵩縣政績卓然擢禮部儀制司主事主諸藩襲封事代藩寵妃欲以支子易嫡謀已就獨豫立不從兩疏請之始得正名嗣王以魚鮓藏金報謝豫立叱之尋擢觀察使正已率屬墨吏皆爲斂跡陞河南左轄出納惟允陞南光祿卿見璫燄方熾上疏請休悠遊林臯者十年

賈志

張邦俊字襟黃韓城人萬曆乙未進士初授御史時抗言起廢棄廣用賢請出閣講學皆人所不能言者又疏請增浙閩秦齊解額四省各得五人增會額天下得五十人定爲例劾稅璫梁永高淮救直臣王邦才等俱載國史人尤難之

賈志

王之寀字蓋甫朝邑人萬曆辛丑進士知無極縣爲里社九十有六

社設師講學絃歌徹於遠邇調慶雲邑方大祲之案一意拊循招綏逃戶輕其丁差又條陳荒狀申請賑濟全活甚衆賈志萬曆三十

四年五月有男子張差持棗木棍入慈慶宮命法司提問御史劉

廷元奏張差語言顛倒形似病狂主事王之案言散飯獄中見張差不顛不狂中多疑似疏入不報時諸臣以瘋癲二字爲鐵案中

旨特點之案爲民天啓元年御史魏光縉薦之案以原官起用二年之案上言乙卯之變鄭國泰欲睥睨神器宜開棺戮尸上不問

五年楊維垣劾張差一案王之案誤皇祖負先帝疏入削籍逮訊

紀事本末

熹宗立之案因薦起用歷陞刑部侍郎魏忠賢擅政與同志

連疏論之楊維垣承忠賢旨劾其貪功冒進又言其納鄭國泰賊

銀二萬兩追贓擬戍劉志選言戍未盡辜逮捕詔獄立斃獄中崇

禎改元詔褒其忠復原官子建斗以廕授戶部主事

朝邑志

李朴字季白朝邑人忠鯁敢言萬曆辛丑進士觀政吏部聞母病請假不俟報輒行謫判高唐起府推官擢戶部主事時朝士各立朋黨臺諫尤好攻擊神宗春秋高不復視朝朴不勝憤上人望幾空一疏不報是時天下正賦多缺朴以爲賦缺由民貧民貧由稅璫爲害先後上書極論皆不省朴每一疏出人爭傳誦朝廷曾無可否由是科道益無所忌後爲郎中復指名劾之疏奏科道四十餘人交章攻朴朴復數疏力辯語侵閣臣葉向高奉旨議處值慈聖太后喪建言例在赦列得不死方朴奏上時光宗在東宮每視其疏曰直臣也及即位進太僕少卿卒

朝邑志

解經雅字岱瀛韓城人萬曆辛丑進士爲汝寧司李執法不避權貴外艱歸起補汾州召入吏垣疏六事十苦十失時稱碩畫遷山東

觀察使卒

韓城志

孫振基字爾構潼關人萬曆辛丑進士為黃縣令歲饑躬視粥廠邑無孄民稅監鵬張振基獨不為屈調安邱罷額外征流移來復千餘家禦寇每先登寇輒解去為給諫上建儲疏又上罷紅丸疏上嘉納之巡視光祿糾寺卿之出納天津稅監馬堂乞兼攝江南疏劾之以言多訐直外轉山東僉事乞休

賈志

李喬崙字孕秀高陵人喬崑弟萬曆丙午舉人官永平府司理備陳

八苦皆經濟名言後為御史敷奏甚多其最著者彈劾魏忠賢一

疏歷官叅政

賈志

薛大中字允執三原人萬曆庚戌進士授寧陵令調太康補黃縣益勵清操運遼海米豆二萬有奇開聖水黃城龍灣泉田千頃擢刑科給事中陳六事抗疏言移宮紅丸挺擊諡法議奏剴切後以疾

告歸

賈志

周文煥字堯章富平人萬曆庚戌進士初授諸城知縣捐俸賑饑以卓異上聞歷陞文選郎中時魏璫欲相逆黨崔呈秀文煥持之不應呈秀數召概辭弗往璫閹青雷欲超選終弗得璫怒矯旨令冢宰自為政弗聽選郎煥知禍及引疾罷竟以憤卒

賈志

馬逢臬字千里三原人萬曆癸丑進士出知襄陵除富民供具之苦

驛遞養馬之累擢御史抗疏請正綱紀指斥梃擊紅丸遂及墨劾票提等事朝端以肅又力救楊漣以明移宮之案劾御史劉廷元三不忠表提牢王之案發覺之功轉山東叅議詔還授御史有為魏璫起祠真定者逢臬束會稿不行疏劾諸黨逆者中察典降山西都事後授南吏部考功主事

三原志

楊建烈字義清韓城人萬曆癸丑進士授江西道御史時逆璫用事建烈抗疏擊之出為叅議璫怒未已先後羅織諸直臣中以危法

次且及建烈會崇禎御極事已召補山東道御史歷通政使

韓志

孫紹統字昌之華州人萬曆癸丑進士授杞縣令歷諫垣遷山東按

察使政聲彌著因論魏璫削職璫敗起原職尋以病歸

賈志

曹代之字若參咸寧人領萬曆乙卯鄉薦初任貴州安順司李持法

平允吏民畏服時黔寇歸附代之治城修學還定安集哀鴻漸至

歷陞工科都給事中風岸峭厲抗直敢言已卯督理秦省餉務庚

辰奇荒斗米二千錢力請減賦鄉人德之

咸寧志

左佩珰字左添耀州人萬曆乙卯舉人授沙河令考選御史疏蠲積

逋以假休息速爵賞以勸軍功寬降罰以鼓士氣軫念沙河邢臺

二邑疲病特疏條陳又上馬政屯田諸疏以不合當事謫應天知

事尋擢戶部郎司漕運出守濟南歲凶盜起攻東明圍泰安列十

三營勢甚猖獗玆討平之甲申京師陷玆入關避地賊欲用其子

重光不從遂死之珰為思痛詩以見志

賈志

薛文周字晴嵐安定人七歲能屬文弱冠成萬曆丙辰進士仕山東
濰縣調掖縣兩邑各建祠擢吏科給諫危言正論多所建白常劾
逆璫魏忠賢幾罹禍賴當事營救得免遂稱病乞歸

賈志

馬鳴世字聲希武功人萬曆丙辰進士歷官操江副都御史初為御

史時抗疏劾魏璫黨人魏廣微顧秉謙言甚剴切又疏稱孫慎行
伸討賊之義排賞奸之典觸忤舊輔為紅丸一案首擬遣戍宜賜
起用又有安民去害一疏甚切吏治後里居逆闖加害

賈志

劉懋字養衷臨潼人萬曆己未進士仕項城陵寧新安令遺愛河南
擢給事中諫止內操薦馮恭定為正學當柄用劾逆璫魏忠賢於
穢焰燻天之日力救楊左諸君子中外咋舌懋恬然不顧坐削籍
崇禎初韓城閭可陞為給諫奏曰逆璫魏忠賢天下皆建生祠惟

臣鄉陝西無祠豈非馮從吾廉耻之教乎其薦從吾之劉懋宜加
優擢疏入詔懋復原官召對平臺稱旨改兵垣主驛遞時驛務費
繁懋剴切言之上方擬大用尋病卒臨潼志。按明季流寇之亂起於驛卒懋疏實爲厲階然其効逆璫救東林亦諫臣之風節最著者不得因其一言之失而病之也

朱國棟字元培富平人天啓壬戌進士歷仕江南蕪湖休寧山陽安
東諸大邑俱有政績及考選戶垣陳奏利弊劾地方大吏凡十四
疏皆報可旋攝侍郎事冊封趙邸却其餽遺以僉都御史出撫山
永修武備興屯牧儲蓄充牣晉兵侍壬午出鎮昌平威望益著武
弁之貪懦者皆自解去中貴申之秀亦疏辭時兵苦缺餉國棟抗
疏請餉士卒感泣以病告歸西安府志

王聚奎字伯明郿縣人崇禎戊辰進士由行人授貴州道御史錄錄
有直聲以建言謫晉藩幕郿縣志

按以上諸公直言讜論悟主匡時今撮其遺事列傳如左至有
風節素著而事蹟未詳者在元則御史王纘長安人在明則給
事中蕭鼎高陵人徐芳醴泉人都御史劉弘道鳳縣人卜歲畧
陽人御史劉寅雒南人楊鈍鄜州人俱洪武時工科給事中霍
榮蓋屋人都御史賈古昇城固人御史李英洋縣人何益西鄉
人李善興安州人任錦商州人王恭乾州人俱永樂時給事中
傅榮洋縣人宣德時僉事張善膚施人天順時御史李琰張厚
俱醴泉人御史劉九經郿縣人同知劉讓朝邑人御史張聞鄜
州人壽王府長史劉蘭清澗人俱成化時郎中鄒相咸寧人御
史張邦敷乾州人俱正德時給事中張汝棟涇陽人御史秦時
吉南鄭人宣化巡撫孫錦綏德州人俱嘉靖時刑部員外郎袁
應春鳳翔人副使張堪褒城人州判劉淳中部人俱萬曆時知

縣為質成漢中人崇禎時皆以直諫著聞

党崇雅字子姜寶雞人天啓乙丑進士累官戶部左侍郎督餉天津順治元年以原官赴京補用九月改刑部左侍郎請更定大清律輕重比附斟酌得宜五年陞本部尚書八年調戶部時車書日闢軍興費不貲崇雅量入為出國用裕如進少保兼太子太保九年請老歸十一年

特旨起用授內翰林國史院大學士加太保兼太子太傅崇雅既拜命入直綸扉夙夜匪懈嘗侍

世祖顧問曰朕以堯舜之心為心而天下未平何也崇雅曰在善推其所為已矣因請給筆札疏六事以進既出或問何事曰入告君而出語人可乎其慎密如此十三年二月

予告歸九月

遣使存問崇雅家居清約門闌悄然每出入一蹇一僮里中不知爲

師相也康熙三年卒

賜祭葬咸如禮

張冲翼富平人崇禎壬午舉人授教諭陞四川平武知縣順治十四年擢御史疏請復諸生歲科兩試並豁免各省灘地賠糧巡鹽巡倉鹺漕肅清康熙十二年

聖祖親試臺垣奏議冲翼名列第一洊歷大理寺少卿乞假歸卒

周之桂字鷺飛咸寧人崇禎癸未進士順治初授秀水令多善政行取諫垣敷陳剴切如請蠲直省宿逋及簡學臣內陞皆見採用陟督捕疏請熱審減等照刑部窩逃例移順天府發配又請置旗人初有連坐例奸民率挾私妄訐之桂奏請行郡縣查

以杜誣枉由是省釋無筭後官至通政使乞歸

李化麟韓城人少有文譽家貧常傭書里中得館穀悉以奉父母
崇禎癸未成進士改庶吉士順治初授給事中晉省民上言某
地有礦願備資開採廷議將用之化麟力爭不可上疏寢其事
居恒謙厚接物至大義所在不可干以私有罪犯應死者持白
金求營脫嚴叱之曰殺人者死天可欺乎其清正如此

高辛傳韓城人崇禎癸未進士初授大理評事

國初改諫垣遷少京兆提調順天鄉試會中使送兩生入闈辛傳
斤之

世祖廉得其事

召對乾清門嘉其風節屢加超擢歷官工部右侍郎韓故小邑土狹
民稠資食於延綏各路亂後盜賊出沒芻粟不至辛傳疏請設

兵神道嶺防守有資商民俱便韓邑距潼關二百里輓餉頗艱再疏請免邑人立碑以志不忘康熙二十四年卒

賜祭葬初辛傳舉進士值闖逆陷西安逮家屬拷餉從兄汲引挺身往事解得逸歸汲引邑諸生順治六年土寇攻城城幾陷汲引倡義設守會大兵救援城得不陷時有謂邑民通賊欲盡勦諸堡寨以絕根株汲引力請於制府止殲首惡由是全活無算

賈弘祚字永錫韓城人順治丁亥進士弱冠能文邑令左懋第極器重之性孝友嘗以祿養未遂終身不置酒張樂不衣裘帛篤愛二弟常捐置義田以通調恤初任章邱令疑獄立剖旋丁外艱服闋補尉氏邑舊有報墾田六百餘頃爲民累弘祚躬行勸課稅額始辦內艱歸再補元氏擢御史封章數十上其舉孝義重師儒一疏尤剴切出視長蘆鹽政商人例餽萬金悉屏弗納

嘗按部所屬餽黃金飲器正色叱之差竣還京請告歸杜門謝客年登大耋好學不倦子締芳字懷伯讀書勵行少從塾屋李顥遊學有根柢聞父道左令軼事心慕之爲搜輯遺稿以崇儉一書付梓年三十六卒所著有思誠錄

楊素蘊宜君人順治壬辰進士初任東明令考最擢四川道御史劾奏吳逆被謫暨變起大臣交章薦之復起督學山西晉人有關西夫子之頌歷順天府尹出爲安徽巡撫值夏逢龍作亂調撫湖廣時武昌新經兵燹加意撫循病革猶採陳民間疾苦竟以勞勩卒官

梁鉉字子遠三原人賦姿英敏登順治乙未進士選庶常旋改給諫遇事指陳得失無所回護直聲震一時清正雅亮歷官三十年猶僦屋而居有勸其置買田宅者則引清白吏貽子孫語以

謝之歷倉場總督戶部侍郎生平於書無所不讀丁外艱悲泣傷目母卒哀毀逾甚遂失明竟卒子澐之由諸生令湖口再令富川馴服苗夷邑中向化歷光祿寺署正清操如一日殆無忝厥父云

衛執蒲字禹濤韓城人順治辛丑進士初授新樂令請蠲荒地賦額三千緡時郡邑徵賦以銀七錢三爲額執蒲請從民便悉遵市值收錢歲省民財萬餘金流亡漸集邑稱樂土尋遷戶部主事督理通倉盡革收漕諸弊廷臣交薦授雲南道御史有請裁所歸驛并復設延安巡撫兩疏皆闕大計旋出視浙甌廉聲特著時西南方用兵秦民困於飛輓執蒲請用水運可自楚直達漢中公私交便歷僉都通政先後疏凡數十上二十七年奉命祭告南海道拜左副都御史以病卒於廣州

王焯字仲發三原人康熙庚戌進士令直隸阜城地雜旂屯民多影射首行均稅法俾豪無匿田田無匿稅更立徵輸十限民無逋賦境內帖然擢刑垣旋掌吏垣論事多達大體晉通政轉僉都陟太常卿皆著清聲尋乞歸癸未秋

鑾輅西巡焯迎覲潼關

天語垂注

賜御書唐律

